

靖安縣志卷之十二

藝文志一

班書始志藝文其中著錄凡五百九十六家爲文萬有餘篇今其傳者不過什二三耳餘豈其不足傳耶抑有幸有不幸耶靖當未建縣以前劉校書卽以詩雄唐代然所謂鵠鶴集者僅遺十四首行於世至如宋胡全州之玉澗集明舒亞學之繫言等書已湮沒不可得則其存者亦僅矣而况是編所輯或因文以存事或因人以存文善觀文者當有以辨別其間也

表牋

靖安縣志

卷之十二

藝文

一

宋

賀登極表

舒邦佐

皇圖有託慈極親傳增二典之光華成兩朝之揖遜古今罕見夷夏交懽恭維天開濬哲之資日就緝熙之學青宮主器翕然民望之歸黃屋受圖久矣聖謨之定月取三陽之泰明瞻兩作之離矧父作子述之同時自祖武孫謀之疊見若堯舜禹相傳於古則脗合而不殊如睿元肅親授於唐殆同名而實異道光三聖法守一家重修侍膳之前規再論執中之數語臣濫叨分守尙阻趨班頃慙四皓之從遊敢言羽就今觀六龍之時御但切雲從



謝賜歷日表

舒邦佐

歷數在躬亦久聞於禹命歲月無易行方謹於夏時恭拜成書敢云故事恭維誠參化育幽贊神明雖自得裁成輔相之宜然必謹析因夷隩之令臣識清臺之密課感丹扆之授時蟄戶初開豈但勉三農之務惟峯回去亦無令二社之差

謝到任表

舒邦佐

索粟長安愧乏絲毫之補分符蒸水謬應綸綍之榮初見吏民具宣詔令告以朝廷所遣吏之意是皆聖主不忘遠之心莫不懽忻至於鼓舞臣性天竅薄材地荒疎徒遠紹于箕裘遂叨塵于簪組半生州縣微善最之可書二載京都俾權酷

靖安縣志

卷之十一

藝文

二

而奚益敢云假寵試以專城弟守嶺陬旣接雁行之近親霑祿養又安烏哺之情在臣之私于計良便惟郡號重湖繁劇之所而路當二廣往來之衝旁列兩臺政拙易於呈露籍惟五邑才乏窘於枝梧矧多谿洞之錯居原欲羈縻于有道于焉分土揚若臨淵茲蓋伏遇執舜之中敷堯之命每貴西京之治璽必書貞觀之屏風知臣久在塵埃倍識里閭之情僞念臣服勤猷畎必知稼穡之艱難特借靈光俾承任使敢不勉忠一得圖報萬分疏導恩波接相流而無際布宣聖德與衡嶽以俱高但使民之安居實爲臣之報國

奏疏

明

建言疏

况鍾

奏爲建言事臣本愚昧非敢有言叨蒙皇上大德深恩擢陞知府欽奉勅書宜體朕心以保養爲務必使其衣食有資禮義有教而察其休戚均其徭役興利除弊一順民情欽此臣固知皇上愛民之心卽堯舜禹湯愛民之心也臣敢不盡心撫民以報皇上恩切緣本府七縣田圩低窪一遇水旱五穀不收又且官田糧重遞年遠運抽取船隻應當水馬站驛科派繁多民貧逃竄田地拋荒近海棚場以致稅糧連年拖欠臣不敢隱蔽今將所言事件開具奏聞一恤民事宣德五年

靖安縣志

卷之十一

藝文

三

二月二十日欽奉勅諭內一款因各處舊額官田起科不一租糧旣重農民弗勝自今年爲始每田一畝舊額納糧自一斗至四斗者各減十分之三永爲定制欽此欽遵查得本府各縣官糧二百六十二萬五千九百三十五石零每田一畝科米不等少者自一斗三升至四斗止多者自五斗至三石止照依恩例共該減除官糧七十二萬一千餘石造冊進繳行移鄉區知會已將實徵開除人民不勝懽忻感戴今奉行在戶部勘合駁查開稱洪武初年古額官田起科已定不在除減之例止令將洪武年間抄沒官田減除緣洪武年間抄沒官田起科多者每畝不過三四斗農民可勝其所不勝者

正在古額官田伏覲勅諭明開舊額官田今本部駁查不準古額官田前後不一人民驚恐莫知適從若便遵勘合不減仍照舊額徵糧有違恩命抑且失信於民前件如蒙准奏乞勅大臣及該部計議不分古額官田欽遵勅諭減免臣民不勝幸甚一拋荒田土事永樂二十八年八月內欽奉詔書內一款民間應有事故人戶拋荒田土有司即與從實取勘開報以憑覆實豁除另行召人承佃中間如係官田即照民田例起科欽此洪熙元年七月欽奉詔書內一款官民田地舊佃種人戶或全家死亡或丁力消耗以致拋荒有司即與召人耕種官田照民田起科如果無人耕種者該納稅糧從實

靖安縣志

卷之十一

藝文

四

取勘開除毋得灑派拋荒重爲民患欽此欽遵行據昆山等縣申取勘到事故死亡充軍等項并丁力消耗人戶名下遞年拋荒無徵稅糧田畝及沿江傍海塌場不存田地數目在官覆勘是實造冊申繳戶部續奉駁回分豁原額改科糧數通彙造冊繳報依奉行屬取勘明白造冊申繳該部又奉駁回丁力消耗人戶田畝仍令照額稅糧如係洪武初年以前古額官田不許減科仍照舊額納糧若係洪武年間抄沒官田分豁原額并今減科糧數明白保結完報行據各縣申除古額官田照舊辦糧外取勘到全家死絕等項人戶三萬三千四百七十二戶遺下拋荒抄沒改科官田地灘塗蕩二千

九百八十二頃一十一畝照依民田起科該減除秋糧一十四萬九千五百一十石零造冊保結于今年十月十五日申繳該部未奉明降竊照前項拋荒墾場不存田地三次取勘造冊繳部經今五年之上未蒙開除稅糧遞年着令見在人戶包納中間多有不肯開納該管糧里灑派逼令包賠以致詞訟繁興人民逃竄前項稅糧雖存虛額連年拖欠官不得用民受其害若再不與開豁轉展駁勘明年又復包荒徵糧見在人戶難免逃移前件如蒙准奏乞敕大臣及該部計議其絕戶拋荒地見名人佃種照民田起科者以今次造冊爲淮卽與開除其墾場不存田地卽係無人耕種之數不分

## 靖安縣志

### 卷之十二

藝文

五

古額官田俱遵詔書開除臣民不勝幸甚一抽取船隻事查得先該平江伯陳瑄奏准不爲常例於各處州縣起運糧數淮安納糧者每糧二千石抽船一隻徐州納糧者二千六百石抽船一隻臨清納糧者三千石抽船一隻俱要二百料匾淺船隻查得本府各縣宣德四年坐派臨清糧一百萬石徐州糧四十五萬石該抽船五百六隻臣看得各縣低窪水鄉錢糧數多每年裝運本處船隻不敷僱覓客商船隻運送其該抽船隻每隻用價米三百石共該米一十五萬一千八百石買船與官軍運糧緣各年遠運費用浩大民貧艱難前件如蒙准奏乞敕大臣及該部計議將所抽船隻停止臣民不

勝幸甚

案况伯律全集疏奏頗多此特建言之始伯律得君行  
政事功彪炳爲有明一代名臣固不藉文詞而傳錄之  
以見一斑耳復經續志選錄實係有關治蹟不可磨滅  
之文補登數篇於左

奏疏

修濬田圩及江湖水利奏

明况 鍾

爲農務事臣本愚昧非敢有言叨蒙聖恩選任知府欽奉勅  
書宜體朕心以保養爲務必使其衣食有資禮義有教而察  
其休戚均其徭役興利除弊一順民情欽此除欽遵外今將

靖安縣志

卷之十二

藝文

六

民情利病不便事件開坐奏聞

計二件

一件田圩事切見本府吳江等七縣地方濱臨湖海田地低  
窪每田一圩多則六七千畝少則三四千畝四圍高築圩阡  
內各圩塍遇有旱澇傍河車戽遞年多被圩內人民於各處  
涇河南取淤泥澆壅田畝以致傍河田地漸積高阜旱澇不  
堪車戽傍河高田數畝畧得成熟中間低田數多全沒無收  
似此民難如蒙准言乞敕大臣該部計議行移本府着落治  
農官員踏勘但有此等圩田地分作小圩各以五百畝爲率  
圩旁深濬涇河堅築夾阡通接外河以便車戽所濬涇河夾  
阡所費田地丈量現數或除豁或照原額稅糧均派圩內得

利田畝輸納如此則高低田畝各得成熟深爲民便

一件水利事近見蘇松嘉湖四府地方內有太湖傍山湖陽城湖沙湖尙湖昆承湖六處地方廣濶約量三千餘里設遇天雨連綿湖水泛漲滄沒田地究其出水原委東南出嘉定縣吳淞江東出崑山縣劉家港東北出常熟縣白茆港永樂初年間湖水泛漲各縣無收欽差戶部尙書夏原吉等提督疏洗民得其利今因年久各港海潮涵湧積漲沙塗兼以各處出水涇河淤塞雖經疏洗人力不敷水利少通實爲民患如蒙准奏乞勅大臣該部計議差大臣一員前來着落各府縣委官公同踏勘但係出水涇河俟農隙之時起倩各府縣

### 靖安縣志

卷之十一

藝文

七

人夫加倍疏通深濶導泄水利所費田地丈量現數明白除豁實爲民便謹奏

俱准行

請申明御史知府相見禮奏

明况 鐘

爲正名分事查得憲綱內憲體御史所至之處博采諸司官吏行止廉勤公謹者禮貌之薦舉之汚濫奸佞者咸拒之糾劾之勸懲得體人自畏服及相見禮儀布政司都司正官來探御史對拜具官上手坐當日回探司前下馬正道入至後堂御史却坐各官上手首領官來見中立還拜知府同知相見御史在上手立對拜通判還半禮知府知縣相見御史出位正中立還拜及查洪武禮制內在外迎接詔勅出使官員

與本處官一同隨班具服依品從班次行禮又禮制榜內所屬官內上司官引馬回避所屬官品級高者遇上司官卑者分路而行已是定制及洪武年間御史詣學生徒說書提調官教官侍坐聽講此實禮賢待士之要法也近年以來各處巡按刷卷公差御史多有違越禮分其各處知府有等場茸貪賊畏懼糾劾不顧名分獻諛進詔有出郭迎接下馬路跪候其過者有照知州知縣丁立揖拜者有跪聽發放回答者有被穢罵凌辱者各失體統無敢言論間有執法奉公不肯阿諛却乃吹毛求疵故將首領官吏借端凌辱擅作威福以爲得體似此善惡何由而分賢士何由而進非惟有乖憲綱

# 靖安縣志

## 卷之十二

藝文

八

抑且故違禮制如蒙准言乞勅大臣該部都察院翰林儒臣定議申明禁約庶使諂佞無僥倖之門正人有激昂之志爲此謹具奏

請建立義役倉奏

明况 鍾

爲民情事據常熟縣申里老周伯琦等連名狀呈本縣近年以來蒙上司坐辦軍需顏料等項均派本縣五百三十里應辦每被收解役戶攬頭人等加倍計價及收料之時又將時值貨物刁難折半收受有侵收費用不行解納者又有解部止納一半回縣捏告被盜遭風失水重復科徵者有糧里在縣爲因差來官員人等催併緊急者令借辦納足後於里甲



處取討以一科十者及府縣該吏倒批指詐財物者以致軍需顏料經年不完差官坐併又復行縣重派科辦近體得每年甲首一名有使用米麥二三十石及五十石以上者有甲首家道殷實通同糧里作弊全不辦納者每里計算使用米麥至四五百石以此小民日加貧苦如蒙准呈乞將本縣五百三十里於秋成時每甲出米五十石如甲內實有事故貧乏者於各甲首分該管里長均辦布貨之類折米五千石本縣置立支收文簿二扇用印鈐記着令各倉場總收并管區糧長收掌每區選服眾里長一名眼同現數收貯本縣另置總簿一扇遇有坐派軍需顏料等項到縣照依時估合用價

# 靖安縣志

## 卷之十一

藝文

九

欽明白將所收米及貨物支撥買辦合用解人於各區現役里長內選取挨次輪流解納如有多餘下年支用不敷另行均辦庶得軍需顏料易完官民兩便具申到府臣間得各縣里老俱稱利便民無科詐如蒙准言乞勅大臣該部計議着令每縣皆置立義役倉及簿管印正官收掌明白出納考滿事故相沿交割年終宜從撫民侍郎巡按御史查考若有侵欺就行究問如此則利派均平奸弊頓革矣緣係切實民情謹具題請旨

請禁詞訟牽連越控奏

明況 鍾

爲簡省詞訟事竊詳蘇松二府詞訟多因秋糧而起蓋屬縣

田地稅糧額重人民逃絕數多勢豪大戶之兼并者佔種他人田地動至數十百頃常年不肯納糧有司不能究理稍欲催徵輒構誣詞告許賴免及有奸詐刁民善持官吏短長慣捏架控詞狀常年挾制糧里攬收官糧作爲買賣或一二百石多至數十百石者有之因而侵剝人已不行納官糧里畏其教唆起滅詞訟不敢阻當又有頑猾人行將病故親屬停屍不埋及將自死孩童用鹽醃鹵每遇徵糧時月捏作人命或扛屍上門或告檢驗三五十人成羣稱作屍親屍鄰圖賴糧里希免官糧有司若不淮理輒赴巡按御史處陳告巡按御史見其係干人命真僞莫可辨明不得已施行無知吏胥

## 靖安縣志

### 卷之十二

藝文

十

老人隸兵人等乘此機會下鄉騷擾以致糧長甲長糶賣官糧使用及至官府訊究得息而本年之糧已被耽悞先蒙欽差撫民侍郎周忱到來總督稅糧究知前弊設法推理詞訟畧爲止息稅糧漸至可徵豈其刁詐賴糧之徒又生奸計興起詞訟往往不經本處官司雇倩幼男婦女作爲家屬抱狀或賈本輒赴北京越控多連府縣官吏所告動輒百有餘名或數百各其送都察院者見其干礙人衆累蒙發回巡按御史提問外其送刑部者因是直隸府分無布政司可以發回又多干連府縣官吏不得不與行提其人安坐在家鄉村被其提擾自謂奸計得行又或牽問被告買免或需求財物或

消折錢糧詞訟若此非止一端計查本府自宣德五年至今  
年九月止奉到刑部都察院勘合及巡按御史按驗計四百  
二十二起合同原告五千三百九十三名又有侍郎周忱批  
狀并本府受狀不計其數因此提擾農民不得安生官糧不  
能催辦若非朝廷委任大臣便宜處置刁訟未易止息如蒙  
准言乞勅法司今後應有訴訟干礙人衆及事關稅糧者俱  
連人詞遞回侍郎周忱處體勘止將有罪之人提問應照例  
者就送有司照例應起解者轉送該部發落其餘干連被誣  
之人體勘明白先行分豁不提如此則非惟虛實易明詞訟  
可息亦且人無提擾稅糧易徵竊此係奸民肆害莫大之端

### 靖安縣志

#### 卷之十二

藝文

十一

蔓延猖獗日後莫所底止臣敢痛切言之爲此差吏典胡順  
齋投外謹題候旨

書啟

宋

迎潭帥朱殿撰啟

舒邦佐

謹案朱子年譜紹熙四年冬十二月除知潭州湖南  
安撫堅辭不允五年正月又辭遲至五月始便道之

鎮

出綺起家建牙分闔四方負篋爭親道德之師十乘載塗奪  
作詩書之帥斯文未喪吾道將興某官心見聖人名滿天下

格物致知之學豈徒師弟之傳救時行道之心要盡君臣之義然而州麾使節出則撫摩講席經筵入而起沃每辭軒冕歸臥山林席間之丈不虛戶外之屨常滿夫豈時之肯舍其或道之未諧今者一札新除再辭弗許灑神毫而親獎表天辰之勉行我克灼知盍起作百城之福達則兼善要盡行六籍之言某自愧庸迂幸同巡管重關起鑰政有望於發明一舸浮湘當自謀於親炙

賀朱帥交印啟

舒邦佐

占著得日植蠶班春父老聚觀皆頂天而鼓舞學徒紛集將借地以依歸喜氣浮湘懽聲震嶽某官動靜語默無息非真

# 靖安縣志

卷之十一

藝文

十一

用舍行藏隨時各當得賢爲重知天語之難回絜道俱來覺人心之自向矧臨新治乃是舊遊登定臺而思于湖之醉吟望祝融而憶南軒之聯轡江山不改歲月驚馳巋然獨存暫屈元戎之臥護足以任重行遂大人之格非某仰止高山逢於湘水尺書賀屢蓋俗禮之未忘丈席凝香覬忠規之親受

賀張侍郎加殿撰知紹興府啟

案宋史張浚次子杓孝宗時爲戶部侍郎面對

言事件時相高宗崩以集英殿修撰知紹興董山陵事

舒邦佐

陞華書殿出鎮輔藩朝登巨賢已在簪筆持橐之列國有大政遂總方伯連帥之權十乘光臨百爲具舉某官材周世用識洞幾先貫日孤忠傳紫巖之衣鉢潛天妙學得南軒之根

源雖公相故是家傳然富貴皆吾自取周詢浙部何參埋輪  
之綱尹正神京不作畫眉之做扁舟忽去一節召歸還天禁  
之從班掌地官之大計惟稽山之萬壑似漢家之五陵方嘆  
此羣工血指之羞遂屈於族庖更刀之後既別盤根之利益  
知遊刃之餘諒即衣歸豈止羶復展大丈夫平生之志了先  
丞相未爲之勲某通家會託于膺門攬轡又依于孔里傳聞  
異數倍激懽悰剪紙陳情耶達凝香之寢濡毫候賀仵聆人  
覲之圭

賀周樞使遷右相啟

案宋史周必大淳熙十四年二月由樞使拜右丞相

恭審升從樞府晉秉臺衡雖聖王詳於用賢非苟片言之合

# 靖安縣志

## 卷之十二

藝文

十三

然天下望其爲相已恨十年之遲想見舜湯選衆之初如聽  
文富宣麻之日君子更相而稱慶國人鼓舞以交懽某官道  
粹聖賢文追盤詰其外如春風和氣潤萬物而無聲其中如  
泰華嵩高更千變而不動蚤聞簡注直上清華奈何正邪冰  
炭之殊遂起漁釣江湖之興身退歸而名愈白民思切而上  
趣還洎重入於修門宜卽登于潭府燒椽燭而書天詔尙借  
筆於二蘇本兵柄而破賊心又託威於一范眾後維巖之久  
矣公如止水之澹然果出前旒亟登上袞勃處右而作相用  
振家聲旦居左而爲師行光世績本以平生涵養之地播爲  
元宰造化之鈞治體重輕人才純駁運之掌上探若囊中自



既去而復來未有太書特書而屢書遂至一命再命而三命  
某官量容雲夢之八九學高洙泗之三千蚤結宸旒徧儀朝  
路雍容卿列少留惟月之班封駁鎖闈大展回天之力不肯  
尺枉力求外庸自作南州之主人甚慰西江之父老化默行  
於几席民自得於湖山百萬之賦請蠲蓋爲邦而固本分毫  
之罪不貸思戢吏以安民一意行寬大之書眾口滿循良之  
譽上曰召用僉曰允諧又恐斯人之失依寧爲大才而少屈  
擢居侍從之地如親咫尺之天既以慰其戀闕之思又以寵  
其殿邦之績只恐繭絲保障難留舟楫鹽梅卽聽賜環靡容  
臥轍某音傳天上喜躍湘中念昔蒙賞音于山水之間而今

# 靖安縣志

卷之十一

藝文

十五

有敝廬在岍嶂之下感既深而喜亦極言有盡而意無窮望  
滕閣之鶯飛難陪客從附衡陽之雁去敢以書先

賀留相進呈聖政會要加少保啟

案宋史光宗時壽皇  
聖政成左丞相留正

進少保

舒邦佐

虞書登御鋪張萬世之休漢相疇庸陞進貳公之秩光生宰  
路喜動朝紳某官開濟兩朝經綸四海胸中藻火斷天下之  
大疑肘後芝參養民間之和氣自毗初正卽見老謀以謂今  
日欲如曩日之安當贊後聖恪遵前聖之治爰彙重華之庶  
政勒成有宋之一經鴻筆摘詞進瑤篇而稱善衮衣陪蹕儲  
寶殿以多儀矧以彌縫輔贊之勞復此潤色發揮之美昭登

亞保庸咨豐功一話一言願永持於國論三公三少看序進  
於官聯某忻聽告庭阻陪賀屢寫金玉而爲訓豈惟觀二典  
之華喜股肱而作歌又將見三謨之續

與靖安范令啟

舒邦佐

奉詔字民涓辰視印宰山水之縣五斗固屈折腰聞父母之  
來一雷皆有喜色可無饋鯉往白飛鳧某官玉壺寒冰銅盤  
甘露價重青錢白壁門森翠竹蒼梧脫穎俊纏揚標宦海愛  
古人之馴雉試大手於割雞今者涖官艱哉爲邑州家索錢  
急如星火縣庭爲政安取絃歌古道難行旁觀太息竊觀今  
元帥龔黃復出則知新令尹卓魯何難三異朝聞十行夕下

靖安縣志

卷之十一

藝文

十六

鼻祖曾攬澄濤之轡耳孫當繼烜赫之聲某辭備有期參拜  
不日事大夫之賢者又何假于薤規有先人之敝廬願少須  
于棠蔭

明

答舒國用論敬畏書

王守仁錄姚

來書足見爲學篤切之志學患不知要知要矣患無篤切之  
志國用既知其要又能立志篤切如此其進也孰禦中間所  
疑一二節皆工夫未熟而欲速助長之爲病耳以國用之志  
向而去其欲速助長之心循循日進自當有至而所疑一二  
節自將渙然冰釋矣何俟於予言譬之飲食其味之美惡食



者當自知之非人之能以其美惡告之也夫謂敬畏之增不能不爲灑落之累又謂敬畏爲有心如何可以無心而出於自然不疑其所行凡此皆吾所謂欲速助長之爲病也夫君子之所謂敬畏者非有所恐懼憂患之謂也乃戒慎不睹恐懼不聞之謂耳君子之所謂灑落者非曠蕩放逸縱情肆意之謂也乃其心體不累于欲無人而不自得之謂耳夫心之本體卽天理也天理之昭明靈覺所謂良知也君子之戒慎恐懼惟恐其昭明靈覺者或有所昏昧放逸流於非僻邪妄而失其本體之正耳戒慎恐懼之功無時或間則天理常存而其昭明靈覺之本體無所虧蔽無所牽擾無所恐懼憂患

靖安縣志

卷之十一

藝文

十七

無所好樂忿懣無所意必固我無所歉餒愧怍和融瑩徹充塞流行動容周旋而中禮從心所欲而不踰斯乃所謂真灑落矣是灑落生于天理之常存天理常存生于戒慎恐懼之無間孰謂敬畏之增乃反爲灑落之累耶惜夫不知灑落爲吾心之體敬畏爲灑落之功歧爲二物而分用其心是以互相抵牾動多拂戾而流于欲速助長是國用之所謂敬畏者乃大學之有所恐懼憂患非中庸戒慎恐懼之謂矣程子常言人言無心只可言無私心不可言無心戒慎不睹恐懼不聞是心不可無也有所恐懼有所憂患是私心不可有也堯舜之兢兢業業文王之小心翼翼出於心體非有所爲而爲

之者自然之謂也敬畏之功無間於動靜是所謂敬以直內  
義以方外也敬義立而天道達則不疑其所行矣所寄諸說  
大意亦好以此自勵可矣不必以之責人君子不斬人之信  
也自信而已不斬人之知也自知而已

序

宋

雙峯集自序

舒邦佐

文章一技耳講摩習熟自幼而壯壯而老始迄於成雖天資  
高妙者或然矧積習而爲之者歟僕早困舉子業竊第後方  
學四六語以蟲篆餘習喜屬對偶試吏善化時鄉曲先達尚

靖安縣志

卷之十二

藝文

十八

書劉公宰長沙文章之伯也又曾爲辛丑省試官僕以晚出  
門生之禮事之每蒙獎誘一日謂僕所通同官書啟皆相傳  
觀甚相敬也然四六當以意勝因摘誦汪彥章勸進第二表  
晁子西賀汪聖錫加學士再任成都回興元王帥啟中數語  
爲驗僕心領意會自是不復專事駢儷每作必求意勝間舉  
似以就正尚書每可之再調衡之糾曹始至之日諸公多以  
筆硯相委徒美無箴後孫侍郎從之至憲台命攝檢法官托  
作數啟每見稱善暇日從容叩之極論四六貴於簡嚴如黃  
山谷詩一字不可苟因謂吳仲權來爲常平使者其論文尤  
高至必相知及吳正字來卽虛以文字之職間爲芟一語更

一字輒如昔人用朔方舊軍號令一施而旗幟益精彩得其  
一二啟誦之雜以詩句小說變化出入真有奇趣故自得劉  
之說而知以意勝得孫之說而知以嚴勝得吳之說而知以  
奇勝他如張尙書子儀之論謂光新中貴純熟純熟中貴光  
新光新純熟二者當兼同年李恭甫在長沙評諸公及僕之  
作以爲有橫放者有縝密者有精巧者是皆足以爲予之警  
也方欲竭思以爲庶幾晚年有成風痺乘之投絃西歸老於  
三徑目昏於觀書手倦於執筆不復記憶嘗作邁子念其生  
平勞甚併與詩文裒之釐爲若干卷錄木以衍其傳竊自嘆  
曰吾之文未必可傳也獨有志無成技不加進今猶可惜耳

靖安縣志

卷之十二

藝文

十九

因書其所得如此抑願借後山向來一瓣香敬爲曾南豐之  
句回向江西諸君子云

真隱集詩序

舒邦佐

真隱集者靖安釋氏子權巽中詩也呂居仁作江西詩派圖  
自黃山谷陳無已以下纔二十五人巽中與東溪可正平爲  
詩詩名相齊人目爲瘦權病可徐師川畫虎行卒章云即今  
耆舊無新語尙有廬山病可師正平詩筆高妙自可想見巽  
中少時瀾翻百世長無意功名平生所蓄皆發於詩題洪崖  
橋有怒翻銀漢浪冷下太古雪跳波落丹井勢盡聲自歇之  
句讀者擊節竒賞由是轟轟有能詩聲一時擅詩名如徐師

川蘇養直汪彥章王性之立之僧覺範正平傾意與交有唱  
斯和金鳴玉酬師川跋其詩云巽中下筆豪特之氣凌跨前  
輩予每見之未示名字輒能辨大率如得李北海字字外出  
骨骨中藏稜讀之者當置軸紬繹想見靜坐時也覺範云邂  
逅雙林對牀夜語聽其誦近詩十餘篇令人骨清神爽通夕  
不寐前輩不浪許予此數語落人間與此詩俱不朽何用後  
人措詞第向來芬芳人口者流傳僅十數篇觀者恨未見其  
全如太白殘月閃閃牕几而至漢之光芒未露也臨川許公  
宰靖安之明年政平俗甯棠陰訟簡婆婆文字間得其詩全  
集諷誦不釋而大帥給事程公鴻儒碩望擁節南服鎮以清

靖安縣志

卷之十一

藝文

二十

靜令修庭戶化行湖山暇日搜遺采古而真隱詩因得上於  
大府意其間豈無隔林髣髴聞機杼知有人家在翠微之句  
如參寥道人得東坡先生賞音者朱絃古調一經品題則是  
集也播傳士夫間將家有之此可爲巽中今日賀而不敢不  
書其顛末如此某與巽中生同縣與其宗人遊得出處甚詳  
晚年宴坐祖席雲水淡如獨酷愛詩每得意忘形作推敲之  
狀出門數十百步忘返不知者意其狂於酒也此集遞相傳  
寫不無魚魯然謹昔人白鷗沒浩蕩采菊見南山之戒不敢  
以意逆之姑俟博古能詩之君子

元

據閱錄序

劉楚

據閱錄詩乃故進士舒君伯原甫所作也伯原名慶遠爲奉議大夫吉安路治中嗣隆先生之長子自幼穎悟壯而操行特異以進士授贛州儒學正再調主濂溪書院未赴家居會紅巾寇起壬辰二月渡江破江州連陷建昌修甯畧攻靖安上下洶洶望風解散君獨曰是草野烏合無能爲也然不可以無禦於是首奉迎監縣潮海公座所署倡義拒敵時道攀大府兵急援不至君爲置酒召父老子弟會庭下歷陳順逆宜以死守狀潮海公慨然躡之君乃繕兵儲糧檄忠義募勇敢厚賞格嚴號令爲固守計然民猶惶懼未決所向久之朝廷有詔諭天下捕寇但正首罪餘悉從宥使者奉詔至且達省府君聞之遣人懷驗夜趨間道迎出之請以援兵倡來省府嘉君效義即署攝縣職君辭曰效義分耳何以職爲次日大合吏民懷疑者咸來聽詔民始知朝廷明見萬里莫不感德思奮自是寇至輒敗之民用稍康九月寇忿大至合圍益急會食盡力匱守城者被執眾乃奔潰寇訊知君爲倡義守者又邑望所屬首焚其居且大索三日得之將盡資藏而寘之死然猶縲紲以行君路賄縛者得脫即易服竄騰空巖穴間自保爲萬一恢復計不徒死也旣再閱月而寇盜益滋義士多戰死大府消息亦不得聞君乃憤不食以卒此其爲詩

靖安縣志

卷之十二

藝文

二十一

豈真流連光景吟弄風月已哉觀其首篇堯天大明侵胥南  
起至述痛悼亡憶舊諸作忠誠悲憤可謂備至其狡狐行殺  
賊歌望官軍皆哽咽欲泣如示昶予曰教育或有成家聲紹  
前往示旭子曰百年文獻俱灰燼賴爾成人早有知其屬望  
之殷悽惋之極何如也又如攀陟崎嶇晚食露坐婦女甘勤  
兒童解慮尤極流離轉徙之態及老牧一歌殆將忘世長往  
而不可得其詞似平其志亦悲而君亦絕筆于是矣嗟乎君  
好學篤行者也生長昇平被服儒雅一旦變起倉卒非有平  
時芻牧之寄大府尺寸之援而獨能奮義結誠以保五鄉十  
六都之疲民振渡江數十萬之暴寇一何難哉蹈艱履危出

靖安縣志

卷之十二

藝文

二十二

萬死以圖後功而事不克遂賢志以沒此天道之不可知也  
今潮海公死封疆之節炳煥東南而君之盡瘁以至於死者  
不惟賞之不及而其家人亦未嘗以爲言獨其鄉之共事者  
咸惜而悲之嗟嗟此固君之素志也第朝廷所恃以風人心  
維世道之典安在哉予固不能無憾于斯也又聞君倡義時  
卽檄進士胡斗元塗淵爲之先後援拔勇士黃雲于編氓而  
重任之每戰用木牛破陣嘗擒殺數十人以歸後銜義戰死  
于陣斗元爲五鄉保正戰敗被執猶格殺數人遁去餓死山  
中塗淵以乞援出不與禍後糾餘民保全奉新合界境上是  
共能無負於君者其知人之哲可謂超出尋常萬萬矣余故

悉及之以俟觀風者採焉

明

况伯律儀曹復姓譜序

御史張駿四川人

往時吾友况子玉嘗言其先世本江右之高安自元季來瀘未百年而音問濶絕欲一省邱隴訪家乘以路遠江長弗果也前歲領鄉薦北上入太學得晤其宗人彥真詢其支派如持左券相符而情洽如也無何聞今禮部郎中伯律先生實其嫡胄相與拜於其門一見如骨肉親示以已手訂譜系一帙且曰是譜所載閱數十世而昭穆有序親疏有等吾大父以上較若列眉有徙居他所者亦確而可據不幸中遭多難

靖安縣志

卷之十一

藝文

一十三

家門蕩析幾等於若敖氏矣惟吾父在嬰稚賴鄉之黃姓嬰撫育而保全之遂從姓黃氏其忍忘乎故遽爾復姓非義也今年已遠矣而吾姓終不復又豈禮乎惟吾父亦有遺命隨白其情于朝聖明孝治天下乃允所請且改給復姓誥命此譜所由續也余聞言而怵然於心當時士大夫率交相咏歎謂伯律之能善於其禮焉記有曰神不歆非類民不祀非族古人之道惟禮義焉已耳鞠於黃而不悖於黃終其身而弗易者義也亦禮也本于况而思復敦其宗而不失者禮也亦義也義之至而禮之盡豈非天理民彝之則在人心者有不可泯乎哉夫禮掌於春官而儀制司爲天下禮法所由準伯

律官儀曹崇禮而達義故手訂是譜不冒紊不遺忘溯流窮源嚴而正詳而有法視乎昔有勸鄱關中而賜姓撫於駱奉先而改宗京房之李牛宏之遼鄭注之魚紛更互易而恬不知怪甘於舍棄其祖而忘厥本源者於禮與義何居聞伯律之風亦可以少愧矣彥章子玉均之伯律宗士也行當議會宗之禮尚何俟余言

忠貞錄序

編修張 洪 蘇州人

知有國而不知有身則不爲事物之所搖動也於此有人焉其才足以有爲其廉足以自守吾將薦之慮人之疑于我也故見善而不能進於此有人焉暴足以破義貪足以敗類吾

# 靖安縣志

## 卷之十二

藝文

二十四

將黜之慮人之怨于我也故見不善而不能退此無他爲國之心輕以短爲已之心重以長也惟吾况公則不然人之有善者若已有之故不進則不已有不善者若浼于已故不去亦不已循其理之當然不恤人之疑與怨也此無他但知忠於國不敢私其身也豈惟用人一切興利除害之事理當上請者其是非利害直言之不敢爲軟媚語以觀其去就人或爲公危之公曰受人之牛羊而牧之者則必爲之求牧與芻豈敢要譽於民爲朝廷愛惜根本不得不然耳王上嘉其忠直殊無忤意事當不請者則自立教條示於民諄諄然如慈父教愚子惟幸其改不樂爲鞭扑也其甚不率教者則痛懲



之可怒在彼非公怒之也嘗錄事之上請者爲奏議二卷榜示於民者爲教條二卷又爲編年一卷以紀其恩數且自勵其事功公之長子定觀自靖安來省其父持以示予序之予讀其奏議則知公事君之忠讀其教條則知公愛民之實讀其編年則知公有感恩自勵之志昔唐之陸贄論奏政體中外又安敷布詔條老稚感泣後世稱爲賢相范仲淹計日之功與祿相稱則其心休休焉曠日無功則達旦不寐如不容焉後世稱爲賢臣况公之奏議教條無愧於贄感恩自勵有合于仲淹不待後世知其賢其名已彰于時矣雖然公豈爲名哉誠以君恩深重不敢自私其身可不謂之忠乎不私

## 靖安縣志

卷之十一

藝文

二十五

其身則不爲事物之所搖動可不謂之貞乎宜顏之曰忠貞錄嗟乎使天下郡守皆如况公民有不安者乎天下之民舉安其有作奸犯科者鮮矣故爲之序又從而頌之一以致吾拳拳之意一以答定觀之請云

送署尹朱漸堂郡丞回任序

舒本立

國家重吏治博選經術雋茂以爲郡國長貳蓋孜孜循良之績乃衡才者輒稱吏難云夫吏非兢兢辦一職標一奇者之難吏而以經術致用歷試當效者難也以今睹邦伯朱公之治行殆鑿鑿乎經術之明效循良之上軌歟而吾郡之得借公也抑有天幸矣公筮仕合仙遊繼令束鹿功曹蒸蒸起兩

邑間兩邑人至肖像尸祝之諸監司使者薦書以十數天子簡內召英業籍公名矣而竟遷而監吾郡也監吾郡薦書又數上而又遷而丞吾郡也監與丞有專職而公居垂六稔則半爲太守攝又累爲各屬邑令攝郡處省會鴻鉅旁午諸大吏所動邑稱艱者輒屬之公公應之若僚之九庖之解焉靖固郡西巖邑尤號難治公慨然與之更始首振士類以風齊民繼詢民瘼吏梗以起凋瘵然而庭無敲扑而野無喧囂也設科條布誠信耳矣去其太甚開其自新耳矣治之匝數月而數月中大吏有期會則赴棘院有職事則赴其爲靖注厝者百俄頃指顧間而政行若流事功輻輳計自今來令者第

# 靖安縣志

## 卷之十一

藝文

二十六

尋其轍卽可臥理斯不尤神奇超絕哉夫組昌之射乘朝氣可以洞堅犀乘暮氣不能穿縞繪何則神賡於全運而能億於久持也公敷歷郡邑而志念不易于初終風猷不間于劇易精神不分于專攝蓋公先大夫爲名太守經術淵源緒業彪炳紹休濟美則爲純孝則爲忠貞昔漢用石君之子非無以也謂其賢賢相肖能康民毗國也而公茲亢蹟騰聲卓爲臣鵠今薦書又相繼上天子按治行必將曰是往籍名內召而復需之外試者今積效徵矣其亟用先朝令甲亟議超遷以風羣吏之以經術效者必且陟公當一面必且徵拜爲公卿蓋邑之人方懼無由復借公而公之自靖還郡也靖民遮

道攀呼尤若將往叫之闔者不佞聞而解之曰公在郡則膏澤一方公去郡將霖雨天下天既幸吾郡固宜推而爲天下幸也夫天下幸而吾郡猶遺霑被哉因序次其語以爲公頌且俟傳循良者採焉

贈邑尹楊易亭膺獎序

舒本立

夫令難乎速爲名也名以實召實以久徵乃卓犖者則名實以旦暮孚焉蓋千將開匣神駒出廐識者亟物色之矣聖天子屬意吏治其與民最親者無逾郡邑守令而直指使者類斤斤焉操繩墨御之非累歲月卽卓犖不得速邀褒檄以自表見於銅墨之儔則毋乃非厲官之全策也乎茲靖安令易

靖安縣志

卷之十二

藝文

二十七

亭楊侯以兩浙名賢來宰巖邑下車卽矢心盡慎起仆陶窳以與民更始行之方匝月卽赫然動父母神明之稱諸大吏咸擊節稱異而直指邵公卽馳檄褒之施不測之譽顯振俗之操挾拘攣之私樹踔厲之幟誠異數也哉先是侯宰閩上杭邑治行聲稱藉甚已載閩乘中不具論論其異者若冤獄夜質諸廟而神贊其評者再大旱步禱諸郊而雨應其期者三精誠格于元冥卽鏡諸前錄鮮儷焉推此治靖固恢恢遊刃耳邵公不嫌于亟譽其殆意前代旌吏者至亟下璽書而吾何敢操常格待異才遲回於一檄以辜天子拊髀良吏之念乎茲舉也亦足爲直指便觀矣繼自今推轂侯者咸將

無局繩墨焉而侯固退然不爲喜若曰甯遲無亟甯實無華甯我無敏銳之名無令邑有滅裂之治抑又異矣昔卓子康旌爲太傅魯仲康宰中牟遷遷至三公國家名德碩卿多起家於令何也被才旣卓犖而心不自有其才大都史所稱廩廩德讓君子也侯以雲蒸飈動之猷亟穎拔於甄覈惟嚴之日而又以淵涵嶽峙之度泯銜霍於聲名暴起之餘所謂德與才合者非耶異日筦樞握柄其勲華靡涯矣然則邵公之譽侯其所識於侯者誠深歟藉令直指皆如邵公令標竒見異者弗泯泯歲月而邑令長之賢者皆如侯卽名孚旦暮無競鶩速化之情則吏治其蒸蒸盛哉余方樂道盛美而侯

靖安縣志

卷之十一

藝文

二十八

之僚屬來謁予言爲侯賀遂載筆授之俟他日質侯行業者以余言爲左券云

陳太守清政紀畧序

行人 凌義渠 烏程人

豫章陳侯以工部郎出守湖州幾三載而一時之薦紳大夫與將吏士民俱徵歌獻頌兼集其聲施之最著者謀壽諸梓余因而善之曰異哉人固有不言而同然者與聞之視身廉者可以正俗御事簡者可以鎮浮居心靜而恕者可以黜英察武斷於不用方侯之在京邸也余以年契時得相接每見其器局端凝詞令簡確而卽識爲異人焉及聞受命而蒞吾郡也復撫掌雀躍而深幸湖民之得所焉蓋吾湖地狹而物

貴百姓外腴而中枯稍通以情則車騎竿牘以日至稍用以威則誹詆以月至稍示以意則舞文巧瞞者以晷刻至種種滋弊日甚一日非得當世重人鎮而撫之未易治也侯下車以來巖然坐理不爲峻刻以拂民情不爲矜莊以干時警事無鉅細必躊蹰省括而後發機無難易必從容判決而有餘以故民之好訟者如控於膝前而無不白之隱士之妄謁者如就於師保而無不懾之邪健役不得肆其爪牙之毒宿胥不敢逞其刀筆之奸游宦不能遂其頰舌之煩豪右不及行其吞噬之志然則侯之端凝筋確而令吾之一見卽異者豈無其故與大抵侯治民甯靜毋擾交遊甯淡毋甘罪人甯失

靖安縣志

卷之十一

藝文

二十九

出母失入而非以摘發爲竒遇事甯使大化小小化無而非以聲色爲尚所以吾湖頻年旱潦百姓常得飽其半菽之甘不至揭竿嘯呼而作慝者皆吾侯三載調護之元氣在也方今天下多故使得如侯者端居要路彼神州雖大不泰然享無事之福與侯之政事悉本學問而非徒取辦於才智故小民能銜其恩而不能言其德士大夫能言其德而不能知其心惟余交最久契最深雖不敢謂知侯或庶幾其萬一也哉

贈舒管生序

徐世溥新建人

余與管生生同月也長又同師憶乙丑初相見盛冬隆寒主人肅客高齋一時郡中名俊聞管生至亦皆絡繹來會中厨

以堂有嚴客催觴進炙恐後左右侍者莫不頤際肌粟酒酣  
以往論難往來酬酢如注顧視僕御亦莫不竦聽移立忘其  
侍之寒也當時年齒並茂意氣方昌各自以功名可立致握  
手爲歡交相言志余獨語管生丈夫精神何窮人生富貴要  
自有限脫踐王路後少有建立即歸休著書娛志自老耳管  
生深韙此言今幾何年間而事會變遷在坐諸賢大半零落  
卽存而可知者亦復難道獨余與管生巋然尙若故吾而余  
又流離轉徙更數十處俸僕盡散孤身餬口以來此邑乃得  
與故人相見追思疇昔盛衰之殊誠可悲也管生今年五十  
矣雖未獲蚤翱翔樹立所學然亦賴是以得全於末流庸詎

靖安縣志

卷之十一

藝文

三十

知非造物者將固存之卑以不朽之名業耶高達大年五十  
始折節學詩杜少陵推其開道路而出風塵吾以爲賢於朱  
翁子遠甚管生之詩先達夫而能者既有年矣當其身被盛  
名或遂爲人所推致若夫懷印綬歸故鄉驕其邑子而會稽  
負薪者吾知管生之不爲也田廬無恙日月方遙卻掃杜門  
立言之業其將在茲乎壬申歲余著易於榆谿一日萬茂先  
過我驟見其稿俛而讀側首仰天而嘆曰子在斯一日千古  
矣余笑謂茂先吾子何善頌善禱也居恆每憶此言時用自  
勉月之二日管生實始懸弧同師之誼卽客此宜來相酬以  
無從者不能獨出也因舉夙昔所謂茂先之善頌者以爲兄

壽夫吾儕在今日而得衣食於深山以爲逸民自非天之  
福斯人莫能至是然則姿天閣撰述之烈信未可量哉

族弟退公詩序

舒一濠

余不解作詩然喜言詩間不自遏亦復命題爲之此如夏蟲  
春鳥候至則應亦頗似小兒騎牛背上信口作越吟周鼎無  
人喉間細細有聲聞人足音則卷舌面赤去矣家管生自大  
父以來代著風雅其父子兄弟倡和師友聲中律呂管生尤  
才情橫絕穎落楮潤驚人泣鬼殆予家供奉哉予每自鄉人  
城輒過柏下草堂敲推連曙時卽爲余言族退公詩文孤峙  
予雖耳聆顧亦風馳雲散也今年春一日出入愁詩示予綺

靖安縣志

卷之十二

藝文

三十一

思清響無語不新昔人評高子業詩高山鼓瑟沈思忽往木  
葉盡脫石氣自青退公惟其有之矣退公甫弱冠目不視今  
人一行字日所切劘類皆唐宋韓蘇諸君子昨纔應試事輒  
得第一人人亦兼美衡文者擬之廬陵之於眉山也詩特豹  
子一斑耳管生知人哉

國朝

五更鐘文序

舒海

余自束髮受書卽好廣覽旁搜顧時習制舉業泛濫詞章於  
身心切要之旨未暇深造如寐者昏昏於睡夢之鄉懵然未  
覺也繼乃七試棘闈不遇甲寅乙卯間躬丁變亂流離播遷

僅以身免凡器用服飾蕩然百無一存潦倒半生坎壈備至  
每當駁歷勤苦之際未嘗不惰焉以悲翻然悔也去春閏月  
不幸先君復棄貌孤煢煢在疚悽苦萬端因念先世歷以忠  
厚傳家先君性尤孝友耿介不阿教人語無忌諱其愛人以  
德之心八十餘年如一日居常訓以祖宗積累培植爲難余  
小子懍懍恪遵求無負乎庭訓年來讀禮杜門閒中攝意靜  
處觀心恍然有悟凡浮氣矜情紛馳勞攘一切無關切要之  
圖沈迷者若有呼之使覺也抑鬱之餘檢輯遺編更借書於  
戚友翻閱具摘其中有關於存心檢身與挽時砥俗者彙錄  
成編更思欲自善以善人遂漫題而弁之彼昔賢之戶牖牆

靖安縣志

卷之十二

藝文

三十一

壁悉著格言几杖盤盂皆書銘語亦此物此志也嗟乎余淹  
困諸生旣無以遇知己而一事無成兩鬢將斑何以慰先人  
屬望之心姑以是推廣乎積累培植之言與爲人子者共相  
策勉願覽是編者恍目警心卽空言而體諸行事使徒謝曰  
莫打五更鐘也則是蒲牢雖吼其如壘俗何哉

舒平叔雙峯集序

檢討黃之雋

序

奉賢邑宰靖安舒君石門出其遠祖平叔先生書一冊曰雙  
峯集凡六卷文八十餘首皆儷體古近體一百二十餘首歲  
久蝨蝕紙斷爛矣將重刻之而以示予謹案先生名邦佐平  
叔字宋濬熙八年進士繇善化主簿遷衡州司錄參軍多善



政紹熙末以疾乞歸嘉定中授通直郎卒見李大異所撰墓誌載西江人物志中而宋史列傳藝文志不載其人與書惟趙希弁讀書附志載舒平叔雙峯猥稿八卷開禧丙寅劉德秀爲序意先生在時所刻故謙言猥稿而曰八卷墓誌曰九卷今六卷何也墓誌云字輔國又不同向也德秀之序不附於集又何也載考集中與朱子周少大留正京鏗岳珂袁樞輩往復之作工而達闇侃而無亢卑類陸官公奏議斐然經術詩格亦高顧不大昭爍與同時范陸尤楊並古之人與書其不泯泯者幾希可嘒也乎然而豫章之木藏山千年以名其郡豐城之劍藏土千年射斗而出雙峯之文藏家千年君

靖安縣志

卷之十二

藝文

三十三

刻之余序之以行古之人與書其果足不朽耶相之也有神其出之也有時夫亦曷虛其泯泯也君嘗摘集中家訓屬金壇王給事澍大書座右故其爲政慎勤而慈惠廉而不苛邑人愛戴之知由母夫人之訓抑源於祖德遠矣

舒東軒詩稿序

黃天球

靖邑有兩才人一乳雙舉若周之八士二難競爽若陳之二一方者余於舒氏得之曰松齡曰龍章

今上龍飛雍正之癸卯特舉

恩榜於夏四月於時今大司馬直隸制府何公澹庵以御史典江右試今閣學少宗伯任公香谷以宮允副之余與李鄱

陽雨蒼輦十有三人司分校虛公明慎極一時衡鑑之精撤  
棘之夕簾吏唱名書榜兩舒君同時獲雋並出鄱陽之門余  
以其生同懷中同榜復同門也爲之狂喜颺言於衆諸分校  
皆起爲鄱陽賀王司亦自喜能得士如獲雙璧於一櫝寶劍  
化雙龍而出於一匣也聞者爭相傳以爲盛事其後再上春  
官不得志鬱鬱以歸丁未不復就公車松齡常病肺養疴戊  
申秋遂以不起余急奔問痛哭久之其年冬余將入都赴儀  
曹任龍章以東軒詩稿來請序東軒者松齡朝夕吟咏之所  
也因以爲號焉會余有事會城受而藏諸行篋中靜夜挑燈  
拭淚展卷吟諷數四覺東軒之語言馨欬聲音笑貌性情品

# 靖安縣志

## 卷之十二

藝文

三十四

格才力志氣與其所歷升沈榮瘁歡愉悲戚之態無不於其  
詩遇之令讀其詩者時而爲之恬然意怡時而爲之曠然神  
遠時而爲之惄然憂集時而爲之悄然思深時而爲之壯志  
激越逸興飛揚時而爲之物我皆空塵勞都息夫詩以陶情  
寫意后夔典樂而推其本於詩言志詩三百篇皆發乎其情  
之所不能自己漢魏晉唐之詩各省乎其人之時地志趣東  
軒之詩具在味其詩可以想見其爲人則其人雖亡而其詩  
固未亡也其詩常存則雖謂其人亦與詩而俱存可也龍章  
集東軒遺稿以哭兄詩八絕句見示語語淒咽情生文耶文  
生情耶想其擗管悲吟時詩情直與血淚俱流也嗟乎余始

涖靖季試而識東軒兄弟越明年並登賢書又五年而於東軒遽有存歿之感而余尋亦去靖矣序詩而追維疇昔慶其始愈以惜其終也

丁卯詩寄自序

舒 庚

許仲梅構別業近丁卯橋故以丁卯名其集余自丁卯北闈落第策筇南歸卜隱邑西之郭雜人境而結廬顏曰自怡蓋有取於杜工部薄劣慙真隱幽偏得自怡之句也噫韶光易邁屈指於今四十年矣念自四十年中不復有馳騖風塵之想矣有時燕息長林間或登臨清壑嘯傲雲山醉歌田舍不覺老之頓至也先輩謂人情必有所寄然後能樂丁卯以後

靖安縣志

卷之十一

藝文

三十五

余自尋其樂隨境生情因情寄興悉以聲韻發之不唯可以消磨歲月亦足陶寫性靈匪若鑿空強作也詩踰十卷體格各殊篇章益繁且又無力全梓以問世祇將暮年吟咏者手錄成帙謀欲鐫之梨棗庶或不與草木同腐用干支以記歲月題曰丁卯詩寄蓋卜隱始於丁卯也豈欲效唐人執爲行卷要譽於大人先生耶存之以示後人知予髮白齒落未嘗一日離硯席卽此以爲傳家之券勿致覆醅甕幸矣昔陶淵明劉靜修二賢清風高節皆有詩文傳世一以義熙紀甲子一以丁亥弁詩集庚生際清時豈敢竊彼芳蹤以自文其陋

哉

漆韜庵耕樂齋序

熊銓

鄉進士漆韜庵先生居於桃源之塢烟嵐泉壑爲吾邑勝區先生已需次得官而堅臥不出迺營別墅數椽環以修竹間以桃柳高峯當其前清溪繞其後茂樹嘉石盤鬱其左右其藏於室也聚古今金石圖書綠字赤文之屬累數百千卷先生仰而眺則山光草色之澹蕩林影墨浪之參差並接於眉睫俯而思則左經右史丹黃甲乙並蘊於胸中又間與諸文士弟子呶晤評騭於其間而自顏之曰耕樂齋若將託於田夫野老之所爲而以鳴其適者噫先生其殆以桃源爲莘野也歟客有過而疑者曰以先生之才綰銅章而佩紫綬澤霈

靖安縣志

卷之十一

藝文

三十六

於一方聲施於後世斯不亦樂之大者耶何居乎託於耕以老也余曰是惡知先生志哉荀卿不云乎志意修則輕富貴道義重則驕王公今之役役于勢利之途者蠅營鼠趨以邀一命當其衣輕齒肥鳴騶呵殿之際亦自謂快心至若簿書案牘蔓引而轆轤吏議束於前輿論迫於後勞心焦思中夜起坐甚者滄洳溷唼大吏色以爲進止一不當意則俯首惕息跼蹐無所容若此者其亦足樂乎其無足樂也今先生旣注選於吏部而超然物外杳不足以累其心巖居而川觀嘯歌以終日方且偃仰一室之間將自混於田夫野老以鳴其適此仲長統所謂逍遙一世之上睥睨天地之間不受當

時之責永保性命之期而先生乃今蹈之其以視夫世之苟  
竊微名以誇耀鄉里者其識量相去何如也客曰先生則誠  
樂矣抑亦奚取乎耕也余曰客亦知先生之耕乎先生有盈  
尺之圃方寸之田雨不憂澇晴不憂旱鋤之以不律沃之以  
隴糜播之以側理籽之以鉛槧種之以不菑之畜灌之以不  
涸之源蓋終歲藝之而不足累世耕之而有餘至其爲獲也  
獵其華而取其實殆不可以斗斛量是則先生之耕也已是  
則先生之樂也已茲堂之得名意在斯乎意在斯乎余姪仲  
和分處桃源爲先生門下士余因得與先生遊覽茲堂而竊  
嘆先生之寄托遙深也於是乎書

### 靖安縣志

#### 卷之十二

藝文

三十七

#### 雲山趙三英先生集序

熊銓

雲山趙符翁先生吾鄉之博物君子也始戊戌之春余與同  
邑爲筠社之課其嗣君重儒與焉越庚子重儒邀會課因得  
登堂拜其尊人當是時先生年七十餘矣而猶與同會諸子  
劇談縱飲酒酣耳熱雄辯風生上下古今事勢之成敗論賢  
人君子行事之得失與吾道之顯晦學術源流之同異辭氣  
慷慨條理洞達若河決下流而東注若泰山之雲起膚寸而  
彌六合至於席闌燈炮夜漏下數十刻猶娓娓不肯休蓋其  
所蓄積然也竊聞先生年少時出入試院累不得志於有司  
適

仁廟南巡士有上書言事驟被擢用者遂提荆緱走千餘里將  
獻賦

行在會

六飛址指逡巡未果志雖不就此其意氣不已豪哉固宜其  
老而彌壯也計十餘年間余與重儒往返者數矣而竊視先  
生之風采議論未嘗少改於前久乃出其藏示之其考据歷  
代名臣碩輔立政安民之大要則有經文集其敍列古名將  
運籌決勝之方畧則有緯武集大都以西山衍義爲宗而旁  
探他書以廣其說誠韓子所謂記事必提其要纂言必鈎其  
元者乃其自序惟以示後嗣而非有志於問世此則先生之

靖安縣志

卷之十一

藝文

三十八

虛懷也嗟乎以先生之志若此其學與識若此而潦倒一矜  
以終因歎夫窮山僻谷華門圭竇之內稿瑣黃馘仰屋梁而  
著書卒以不附青雲而名湮沒不彰者可勝道哉不龜手之  
藥一也或裂地而致侯封或終其身於泝澣統非獨用之者  
殊也其所遭殊也抑又聞之大丈夫擁書萬卷何假南向百  
城則先生之手一編以自老雖不遇於時其亦有樂乎此者  
矣往年晉陵黃璞庵師宰吾靖搜訪遺逸重先生之爲人而  
又嘉重儒之力學有聲也蓋式其廬者再焉尋內擢儀曹聞  
先生屈入裘猶郵文以侑其觴以璞庵師之不妄許可而獨  
惓惓於先生乃爾者夫亦知其素所蓄積不苟也日月幾何

先生下世遂已逾年重儒謀以是集付諸梓請余言以弁其簡端在易之困曰有言不信余方困何足以重先生抑漁者之釣也匪魚之亟求而必沙磧石蚌之先具沙磧石蚌不足食而取魚之餌在是也然則始以余言爲餌也可

### 石門山志序

分巡南  
瑞道周體觀遵化人

寶峯在靖安縣之西北去城四十里而遙唐貞元中禪師馬祖示寂於此山茶毘之時舍利無數其徒奉而藏於珠峯之下故稱寶峯云初師之說法於鍾陵開元寺也學人雲集入室弟子至百有三十九人宗風之行於斯爲盛然皆不在寶峯寶峯所由盛則自師登建昌石門山顧而樂之屬侍者歸

## 靖安縣志

### 卷之十二

藝文

三十九

骨焉卒成埴識建昌石門山者卽靖安寶峯也唐輿地志云爾寶峯之盛正以馬祖藏埴始盛也自時厥後屏障頓開梵宮聳立尊者老宿玉席嗣興不能悉數若夫石門數十里之地畫翠袈裟別院精藍拱衛珞璣雖劫灰屢見而此峯巋然其有精靈者存也山子和尙往自會城入於方丈掃舊老之遺墟攬龍門之獨秀以爲厥志未成終爲缺典於是綜輯形勢之全考核師承之緒乃至筇枝碣石亦遡因緣尺地寸田必求版籍蓋篇幅雖隘而攬據爲勞授梓有期馳書徵序推斯志也可謂振祖之慈孫開山之哲匠矣顧余未踏雙溪奚酬名勝頃從郵本以寄臥遊爲之裒衷抵几慨然思命駕其

間漱泐泉而禮祖塔庶幾靈光一遇浣我心脾塵網牽人雅志未遂嗚呼自佛法入中國天下名山強半皆僧彌之所依據學士大夫常引以爲恨恨籍第令以朝市易山林其果能如釋氏之志勤而守專不受纏徽不生退轉長有此而不失乎讀寶峰志又不禁其掩卷而三歎也

案前志藝文補遺載有傳修重修寶峯寺記今案其文乃周體觀所作山子和尚寶峯志之序也竄取原文刪其序志之語意補綴爲記不及序文之暢達也傳修未知是何人周體觀字伯衡見通志前志序易爲記當時或別有據茲從石門山志考正載入然語意雖同而序

# 靖安縣志

## 卷之十一

藝文

四十

記各別故兩存之亦不嫌於重複也仍登於右後之覽者得以參考焉

### 重修學宮勸捐序

李紀

治必資於則古事莫切於崇先矧人材爲敷政之原而學校乃育才之地乎按之靖志邑始南唐職方氏掌其圖形方氏辨其制而且龍岡列於右旂竿峙於東文筆聳於前曬袍環於北雲深繡谷葱蘢吳憇山頭花簇桃源掩映虛宅里訪葛翁之仙躅丹竈依然尋謔母之芳踪苔痕宛在諸峯挺拔蔚變豹之班文二水匯流耀騰蛟之鱗甲以故歷朝科目代有聞人讀舒平叔之遺文清新俊逸稽幸清節之判牘慷慨



忠誠徐幼醅孝友可風李宗頤治行稱最蓋地靈人傑自昔  
爲昭考獻徵文於今尤信此曾南豐有清華之譽曹文恭留  
衰繡之稱也惟是縣治始規學宮並建而沿襲已久塗蘖宜  
勤宋尹黃宗諤修之於前明代金文英葺之於後考舊址毗  
隣法藥寺禪棲止舍鉅麗甲於境中類水辟雖卑隘幾於容  
膝遂使瓊樓紺宇下瞰宮牆梵語鐘聲喧於絃誦縱復易地  
以量改終嫌位置之未宜此固司牧之契龜乏術匪徒修葺  
之橐閣無人也余於庚辰季冬蒞靖循例謁  
廟拜瞻之下卽懷興舉上以體

聖天子崇儒重道之盛心次以承庭訓興賢育才之素志迨

### 靖安縣志

#### 卷之十二

藝文

四十一

晤僚屬及合邑紳士詢謀僉回頭陀刻行苦志於其掛錫之  
處尙能結構連雲吾徒束髮授書豈於

先師式憑之地敢任鞠爲茂草其志願才力自當百倍於他  
流而壁瑤璇題於以迥異於陋室顧使絃歌之邑頽廢若茲  
將來祀典之修名物何在豈緝紳之責轉遜於緇衲之徒而  
功德之私反勝於科名之盛耶但眾擎易舉一木難支集腋  
成裘萃諸班以絢采醲花釀蜜薈百卉而皆香所望鄒律同  
吹吳音共著甯無將伯必有和予行見講堂奕奕諸生釋褐  
而來禮殿巍巍多士登龍而去是爲序

修霽峯塔敘

張元音

昔阿育始造浮圖自佛入中國而浮圖遍於天下然亦彼法  
自用以藏舍利耳後世形家之說盛行以浮圖尖出爲有類  
於文筆且謂鎮固不搖足以收攝地氣揆古人相度陰陽之  
理蓋亦有可信者以故都會郡縣所在皆有塔靖安山水與  
區也城東外半里而遙有曰登高山岡巒明秀高不過三丈  
按之方位在縣治巽宮主應一邑文明而又南溪一水自西  
來而北而東以趨於馬草湖此山連接金城近扼其衝亦實  
下流之關鍵其上舊建塔五層碑碣無存莫詳朔修所自歷  
久甃石多迸裂頂首鐵蓋半毀草樹枒叢生殆將傾圮道  
光癸未春邑人士請於本任北平張公欲重新之適奉檄修

## 靖安縣志

### 卷之十二

藝文

四十二

縣志因以兩事竝舉倡議勸捐定陶伐石是年冬十一月興  
工當拆毀時得萬曆制錢六枚意卽建於明神宗朝者與然  
年月究不可識矣工未竟張前令有京師之役余來承其乏  
督催匠作於甲申十一月落成方嚮悉仍舊址周圍擴大一  
丈餘尺上增二級初基用石磨治極堅潔層累而上空其中  
而各爲樓計用磚埴之物約十二萬頂以甃上奉藏佛一尊  
爲少府董君所助復得東門陳氏先世手寫金剛經一襲並  
藏度焉蓋教本浮圖卽以其道治之耳諸紳以塔旣重新宜  
有嘉名肇錫余觀縣北雙峯霽景爲邑中最勝正與斯塔遙  
相對峙因卽額以壽峯合尖以來檐牙高聳秋煙瘦影如展

畫圖而凡宦游斯地及行客自會城來者十里外遙望山腰  
半露亭亭林表已識千家縣在其下清華間矣况居人生長  
是邦以時登眺其巔撫今追昔能毋有進而益上之思乎是  
役也與志事合修而各分其籍凡用金錢三千緡有奇同城  
諸君子與在局董事逐時稽察寒風暑雨不憚往返之勞而  
其日夕在工監視者則舒王二者老也名氏已俱列志首茲  
不備書

寄贈舒莢房大令序

禮部陳用光  
新城人

靖安舒君莢房以進士起家先後官粵東十餘年其在英德  
既於老地灣產煤之區人衆而爭者懲其罪而保其非盜使

靖安縣志

卷之十二

藝文

四十三

不興大獄及在豐順又於湯坑羅姓強橫之案能得其主名  
而置其魁於法制軍蔣礪堂先生稔知其賢委署潮陽補新  
安復調香山先是同僚有在洋捕獲十人而以海盜通報移  
縣勘訊君訊爲鄰邑良民爲颶風所漂失者立予開釋不肯  
附和然遂爲所中傷由香山復回新安君治事一如其初不  
少懈方伯趙邃樓先生每稱爲君子余所聞於粵中賢士大  
夫者如此數十年粵東之華縉膏腴幾甲於東南爲吏者咸  
視爲樂所然余聞天下吏治之不振亦粵東爲甚其蓋心獄  
獄而惠愛在民者如羅月川中丞李鐵橋提刑今皆受知大  
府薦於

天子歲月間驟膺顯擢以君之慈仁篤厚信於大府使更久於其任安知不擢爲牧守觀察而君之在新安也以重洋涉險封翁韻窗先生僑寓羊城不獲就養時切鄉思遂決然引退久始得請蓋志於民事者必不急於榮進大抵然也然君之歸以己卯冬而次君屋庵遂以庚辰舉進士今年選爲庶常韻窗先生年八十五耳目聰明君以周甲之年奉耄耄之親移榭承歡抑搔養志仲君讀書中秘長君亦以拔貢需次縣令聚順一堂其視躋膺仕而肩艱鉅者勞逸苦樂爲何如此固封翁福壽履庇之澤而亦君爲吏能盡職愛民之報爲不虛也余與君有姻連世好雖未獲面而喜聞治行之詳及

# 靖安縣志

## 卷之十二

藝文

四十四

家門樂事之盛因庶常假歸省親遂書此以贈實事求是不欲以虛美之詞浪抒頌禱也是爲序

### 寄生草叙

南昌胡壽椿 硯生

少白先生以寄生草一編見示余受而讀之其氣韻恬雅音節悲壯一本性情所露歲乙卯粵匪擾靖奉諸邑因避居山鄉時時發爲詠歌以見志少白抱忠愛之忱具戡定之畧多慷慨激昂語而猶不失風人忠厚之旨其詩固卓然可傳竹莊觀察與少白交最深竒其才嘗招賓幕中觀察統兵援江右先後克數城懲逆黨之暴掠則出而勦擊之痛百姓之瘡痍則入而安撫之觀察之所以重少白與少白之見重於觀

察者不更相得益彰耶少白之抱負如此其出處之正氣節之特立已可概見侘日有所展布其建樹正未可量非徒吟弄風月寓感慨於時已也余不能詩而獨愛詩人之詩愛其託志忠雅抒寫性真以爲有裨於政教風化之所不逮讀是編遂不能已於言然與否與還以質之少白

### 劍光詩鈔序

刺史甘揚聲 崇仁人

詩者持也持人性情也人稟七情感物而動情極貌以寫物辭窮力以追新不有以持之則縱轡騁節望路爭驅任氣使才或未能悉軌於正劍光先生粹然儒者也弱冠戾頰宮三十歌鹿鳴五上公車不第比歲泛跡巴華間與予往來過從

## 靖安縣志

### 卷之十一

藝文

四十五

濟高平以周覽陟臺榭而婆娑似無不得意者壬辰夏示予奉 旌母壽百齡等詩悅豫情暢磊落如琅玕之耀炳煥似錦繡之華洋洋乎燕許儔矣茲復以全稿囑予別擇正襟期誦則愴恨悲懷或昕晤而仰思或據翳而哀鳴或結典籍以絕俗或忘毀譽以保身至兄弟子女之間境旣迤邐情尤懇篤墳壘壘而接隴淚浪浪而沾巾目想心存鬱悒何極慘觸緒以成聲幾令人不忍卒讀若乃志抗浮雲分覽止足年乍臻乎指使視早邈乎公卿自嘲自遣得非有激之談乎尸子曰貧窮太行之獲也疏賤義之凋虎也吾而日遇之亦足以試矣先生超然遠引靖志抑情其執凋虎以自試耶夫遺寵

榮崇道義所謂貞固不搖持定堅定慷慨以取昭晰吐納而  
縟英華詩人之體要其在斯乎鉄珊中翰跋先生詩云艱難  
徵道力身世淡浮榮洵不誣也况居今識古論世知人徵存  
亡標勸戒片語微言依經樹則此一已之性情以持千古之  
性情赤心假山諸作不誠誅深斧鉞萬世魂動哉逮夫試帖  
抽秘騁妍雖棘院之後軍實詩人之餘事先生因物付物婉  
轉關生裁雲製霞無不妙合自然也予歸田十載筆簡久荒  
加以老嬾頽唐百事俱廢識如餅管詎能品列鴻裁惟就持  
人性情之說而序其畧如此

顧山陳公春華捐產資訓序

熙恬

靖安縣志

卷之十二

藝文

四十六

他邑皆有賓興而靖邑闕如詢之紳耆知向有議之者而卒  
不果以是嘆官斯土者之無意文化而士風所以不振也夫  
賓興之設非必果足資士之貧者然人以有所勸而勵果令  
資斧有藉於以近挹芹香遠探桂籍與夫觀光上國貢於京  
師夫誰不激昂青雲求出人頭地哉雖然一邑之舉良非易  
易獨怪一一盛族家有蓋藏不能出其餘資以爲宗族之有  
志者勸無怪聚族而居一領青衿輒驚爲天上人有可嘅也  
夫顧山陳氏自玉端公始卜居斯土其先系自江洲家規多  
出翰林學士宗諤北齊唐隋皆旌表義門蓋所以訓誨子  
弟爲首務云陳子春華其裔孫也承厥考之志捐緡置產爲

宗族倡於是羣有志者各出其餘資以爲子弟終歲延師訓迪之用名之曰資訓會洵盛舉也余己酉年九月十七日受斯邑篆今庚戌九月十七日適一年邑人士多與游焉今歲復主講雙溪書院春華余所課士也持伊業師廖君資訓會序復索序於予春華其有志乎哉春華之言曰廖師以孝慈與公歸美門生門生弗敢當余謂春華卽以是三者當之無愧色抑余良自愧已爲民父母有養而兼教之責乃不能倡舉賓興以爲闔邑勸如春華者非有一家之資非有甲族之富祇以先志未畢不吝出其薄蓄以倡成義舉異日其族之子弟採芹折桂看花長安英才輩出後先接武皆春華之力

靖安縣志

卷之十二

藝文

四十七

有以貽之也使家家有若而人邑令復何歉乎哉然邑令不滋愧乎哉是爲序

文

宋

祭張南園文

舒邦佐

紫巖衣鉢親授南軒跡在彝鼎妙在青編况六經學諸儒橐穿公發與旨千載無傳四方景仰如見伊川維皇召歸山立講筵雪未見現儉人弄權夜奏諫書如逐雀鷗薰猶不並歸臥南園有詔強起婁師藩垣建牙几極欽實隸焉某假守符得屬囊韃清風喚醒書洗瘴烟矧於柏門托契自先中興之

功忠義摩天効官錦里適遠松阡匏繫弗躬寓酒薦虔胡不  
我待涕出潛然尚觀遺範奉以周旋

明

祭范次房先生祠堂文

知縣 張伯祥

繫光岳之氣分兮歎士夫之全節慨三綱之凌夷兮悲五常  
之缺裂苟一事之克忠兮亦清議之攸屑猗夫人之挺生兮  
孕雙溪之清冽起科甲以筮仕兮應穹昊之宿列蓋以身而  
許國兮秉忠心其餘鐵憫苛政之殃民兮偉言辭之激切荷  
綸音之褒獎兮將登仕乎稷契惜時宰之妬賢兮剖鬱林之  
符節忿權奸之罔上兮抗封章其匪訐致九重之俞允兮祛

靖安縣志

卷之十二

藝文

四十八

嶺南之妖孽視龍逢之忠藎兮雖死生之懸絕論委身以事  
君兮實同途而一轍始朝陽之鳴鳳兮允一邦之人傑雖世  
遠而人亡兮在邑乘其猶烈胡祠祀之弗彰兮幾耿光之湮  
茂顧樗材之無狀兮慚名器之盜竊仰高士而欲企兮爰齋  
心以祇謁奠神主於故祠兮誕徽稱其扁揭聊束芻以致奠  
兮惟寸衷之是竭昭萬世之綱常兮庶民彝之不滅

傳畧

明

况太守前傳

張 洪

太史氏曰吾聞古有汲黯爲東海太守歲餘而東海治人爲



主粟都尉知無不言面斥丞相宏御史大夫湯於上前上不之忤數犯人主顏色上益敬禮之再爲淮陽太守而湯敗上益賢黯司馬公爲之作傳郡守立傳自黯始今禮部郎中況公奉璽書爲蘇州太守論事切直不爲軟媚語上多嘉納之氣節無愧於黯惜無如司馬公者列其績徒以史氏之名執紀載之筆能無愧焉然其事可爲後世法他日訪求名臣事績以成一代之典未必不權輿於此也公名鍾字伯律江西靖安人自宋以來珪組蟬聯元末兵亂家殲于寇祖淵亦與天不泯其祀愍遺一孤年方六歲匿於父之友黃氏遂從其姓旣長就學字之曰仲謙實生太守嘗命之曰黃氏活我吾

## 靖安縣志

### 卷之十一

藝文

四十九

不忍捨去汝苟成立必復吾宗公旣受命刻志於學秉心方直律已清嚴習知禮儀處事明敏前禮部尚書呂公奏補儀制司主事朝廷每有大禮公必預聞舉無遺失陞本司郎中凡册立后妃帝女下嫁諸侯來朝四夷世見禮儀聘幣宴勞賞賚損益輕重皆合時宜由是得上意賜與無虛歲洪熙改元賜誥爲奉政大夫職位如故追封父仲謙散官職位同母妻皆封宜人給鈔二千貫爲五鼎之祭告於祠堂旣歸追思父命以復姓自陳上俞之仍賜况氏誥命五通蓋特恩也宣德五年五月皇上以江南賦重餉道遼遠思得廷臣之賢者以爲郡守今禮部尙書胡公舉以應詔除拜蘇州府知府賜

璽書褒勉乘傳之任既下車留屬官之任事者黜庸懦官孫福輩十餘人革冗役圩長九千餘名執害民經歷傅德貪賊知縣任豫等五人添置催糧官以供餽運上其事皆從之以庫藏缺敗帑幣簿書慮有遺失新豐盈庫增置架閣二十餘楹以姑蘇內外驛歲久頽敗不庇風雨使客至無所居完葺其舊各增置寢堂兩廡臥具什物外驛別置重屋以臨大川可以登眺擇民之謹厚者輪充館夫里胥不得差免斥去浮薄無藉使客不得夤緣爲奸以府治無燕寢建退思堂及兩廡厨爨客至可以延欸公暇可以休息清心養神爲出治之本凡諸營建皆撤沒官之舊材因臺皂之餘力煥然如新民

靖安縣志

卷之十一

藝文

五十

不知費以倭船徵需無度奏革去之以水道淤塞不通奏疏濬之請免折收舊欠糧草鈔數百萬民無鬻妻賣子之感辨明被誣爲軍者千八百家路無銜寃籲天之聲請免洪武三十五年借撥經兵州縣驛馬若干正奏減重額官糧七十二萬一千石召民開種戶絕荒田照依民田起科減遞年包荒糧十四萬九千五百石罷平江伯歲取民船五百艘免買船米十五萬八千石皆病民之膏肓貽患於無窮者一朝剷去民喜且愕如出深淵如履平地生旣死而肉枯骨也劾罷治農官及冗官徐亮則素餐者益少擒制豪民互相魚肉者則梗化者釋去初崑山民有負海爲固府縣莫能致者聞公威

令奔走服役恐後矣公以糧長收糧作弊言之於上詔遣六卿之貳巡撫天下爰是工部侍郎吉永周公來旬來宣以惠南國與公同德一心身任斯民之責因轉輸有遠近之殊公言蘇之民不加於他郡而賦粟倍蓰既竭其膏血以供之又窮其筋力以遠輸寧免不均之嘆得減運臨清糧六十萬石未及期月事皆就緒以爲政之餘力致孝於鬼神凡學校山川社稷太伯伍公范公白龍之祠皆作新之因民之心以爲心民皆愛戴立石誦德神靈安妥罔有怨恫祈禱雨暘應答如響自非德合神人何以臻此六年三月奔繼母喪秉燭治任詰旦就道公旣釋位軍民懷思咨嗟涕洟如失慈母爲之

## 靖安縣志

### 卷之十二

藝文

五十一

謠曰况太守民父母衆懷思因去後願復來養田叟未幾貪饕者垂涎相噬善良者怯懦畏伏雖陋其膏鹽其腦莫之敢較於是七縣士民列公之廉明剛斷涖官臨民之政封上乞公還任詔爲奪情起之七年正月公再至禁詞訟之株連者民無業而遊惰者以供辦名色聚斂賄賂實不供官者以官田作民田盜賣者賦役里甲貧富不均者父子僞爲別籍者駟僮隱匿商稅者耆老倚法爲奸者溝澮壅塞有妨灌溉者橋梁傾圯往來病涉者增修學校保選師儒奏免濶白三梭布七百疋免費銀數千兩皆民間切務令行禁止氣象爲之一新招還逃戶三萬六千七百戶俱復舊業停徵滄沒田糧

二十九萬五千石分常熟軍民之田以正疆界辨御史相見之禮以正名分禁軍衛徑行屬縣以明體統置通關勘合簿以防虛僞籍民間善惡以示勸懲爰是懷奸挾詐者斂迹載避險而健訟者絕念公庭申明婚葬之禮示民以始終之道謂婚媾爲人倫之始豈可論財以失男女之時喪葬爲送終大事豈可以年月不利家道貧乏暴露其親彌月之間愆期之婚畢嫁久殯之柩皆出民得其情如夢呼覺曰匪公之惠吾罪曷除又請以夏麥折布則麥可以療饑疏濬河道則旱澇有以宣泄勸富民出米以待饑荒皆預爲之備也以強規事執百戶林保以違法事黜縣丞賈敬革耆民之無狀者選

# 靖安縣志

## 卷之十二

藝文

五十二

有德代之均其徭役民不怨嗟舉合時宜動皆中禮由是市井草野之民同聲頌德無有異詞是年冬入覲言頌民好訟波及無辜柎械赴京死亡甚衆乞付巡撫官推理及妄動實封等事皆報可八年正月二十一日中官范安宣賜御製招隱歌并詩共三卷陞辭之日欽給路費千貫三月到府適當春耕農民無食兼乏穀種發濟農倉米賑之易穀種分給保畱嘉定吳江知縣祖述賈忠除奸吏潘承祖清舊役隸卒民心大和是月甲子有白鶴數十自南來北來之鶴如南之數盤旋於府治之上久之乃去丙寅羣鶴再至如前觀者以爲和氣所感六月奏停旱災糧十四萬石七月蝗入嘉定縣境

所至草木皆空方撲捕間忽大風雨從西來颺入海中蝗不爲患公慮凡百差遣人需索各縣財物置簿令公直耆老寫記朔望考閱人皆畏憚斂戢民得甯止推官方矩執法被誣爲之辨明常熟王簿郭南清廉公正保陞知縣皆俞其請由是君子得行其志執貪污知縣白圭巡檢顧中皆抵罪由是小人不敢肆其惡民以遞接官物終歲在官不得販負公驗丁輸差歲不過三次罷其在官者民始遂其生理奏劾鎮海衛指揮陳璘及無藉兵卒各抵罪軍始戢而不肆置綱運簿以防運夫侵盜館夫簿以防非禮需索綜理周密而不煩行之甚易而不疏可爲爲政之楷範八年夏旱公以預備糧賑

# 靖安縣志

## 卷之十二

藝文

五十三

之民得致力於南畝稼事有成是年秋公與巡撫侍郎周公講求收糧之法痛革前弊原其致弊之因蓋由永樂間秋糧轉輸北京餉道遼遠糧長以一徵三本府正糧二百七十萬石加徵至八百一十萬石除正供及餽車船之費羨餘皆入糧長之家奈何富者不豪橫貧者不失業乎乃議別立糧頭以分糧長之勢眼同收受互相覺察除免舊徵三分之一以其二之一爲轉輸之費餘米皆入濟農倉以爲來年經費之本代納民間宣德八年馬草免糧長徵收馬草糧數十萬石九年夏稅折布免民間絲數十萬斤絹數十萬疋小麥數十萬石小民所種麩麥糧長無由科徵皆得入民口中下民鼓

舞歡聲動地二十餘年積弊不戮一人而盡除是年夏秋復大旱公白巡撫發濟農倉米賑之活數十萬人又以餘米買辦雜出供費上不失科徵之期下不取毫髮於民雖壽考人亦謂自洪武初以來實未之有蓋創見也此其大畧云爾若夫議論周密指畫詳明則具於忠貞錄中奏議教條二篇茲難縷述也嗟夫公爲郡守而功績彰彰如是他日爲太平宰輔事業廣大必有大手筆繼此而書之姑爲前傳以備采擇焉

論曰唐陸贄有云財者民之心傷其財則傷其心爲政以得民心爲本必先裕其財乎况公下車以來剷除積弊肅草橫

## 靖安縣志

### 卷之十一

藝文

五十四

斂減秋糧倍收者二百七十萬石以其餘米代輸民間馬草夏稅買辦雜出公費免徵需米若干萬石匪直不科於民抑俾糧長里長藉此侵漁者皆縮首退避人道敏政信斯言乎不甯惟是奏減重額官糧停徵水旱災并拋荒田糧及平江伯歲取民買船米無慮一二百萬石可謂裕其財矣昔也民謂之何今也民謂之何欲求民心之弗和不可得矣民和則氣和氣和則薰蒸上下感祥召靈諸福之物不期自至白鶴摩空豈但蕭芝之雉集蝗入於海殊勝劉琨之虎去有其德者必有其應是故召伯之化行騶虞見於南國宣父之文著祥麟遊於魯邦感通之理不可誣也觀之於今益信

陳烈女傳

修撰 劉儼 吉水人

陳娥名若英高安赤土人也陳氏邑大家世有聞人娥之父與學隱德不仕娥自幼聰慧柔順父母極鍾愛之教之經史諸書輒能通其意年十三許聘舒生璉父母告之曰舒氏詩書名族閨範甚嚴汝宜修女德以求無忝娥承訓益自修飭正統十二年舒生自北京隨父之任嘉興五月得疾卒於道八月十六日訃聞娥悲痛若不可生者母憐而解之曰汝身未明何辛苦乃爾娥曰身雖未明而心已許名已定矣可他適耶遂竊入寢室自縊死時年十九舒母聞之痛逾於哭其子且厚祔之屬曰賢媳婦吾無緣與處也幸母葬以待吾子

靖安縣志

卷之十一

藝文

五十五

櫬歸並葬焉庶少慰其意於地下娥家如其言是年十有二月十七日從舒生葬於白粉山之原鄉人號曰雙塚云嗚乎古稱烈女不更二夫以節義言之也今陳氏於舒僅有夫之名耳而能憤以必死若旣離然者惡更其名以玷其身也名且不欲更以負其初心累其清德向使與之齊焉其所守之節吾不知其何如也考之傳記柳氏女爲王野而終孀其事似之而柳未卽死奉天竇氏二女遇賊投崖下其死似之而竇出於迫視娥之視死如歸以全其名誠曠世僅見者也然王與柳其名因以不泯然則璉亦可以不泯矣

國朝

孝子錢士琳傳

知縣黃天球

錢士琳字仲玉號益謙廂都人父大縉娶漆氏生士琳年二十八漆病篤意不忍舍其子大縉曰若慮我娶後妻耶試以甕杯投礫石而杯不破者乃更娶杯擊石應手破裂漆強舉首視之還就枕而歿大縉遂終身不復娶鄉里舉爲義夫士琳年十六以經義見賞於張學使補邑諸生痛母早世而父鰥居力敦孝行晨夕不離父左右每念母輒私涕泣趨父側便爲歡容齒未四十卽離妻室而臥父室服勤無間父性不喜臥帳中擁厚衾而好飲酒夏秋多蟲士琳率夜持扇驅蟲至天明數年後蟲竟不入父室人以爲孝感所致嚴冬慮衾

靖安縣志

卷之十二

藝文

五十六

薄夜寒稍聞欠伸卽進醕醪以資溫煖夜必數次以爲常順治丙戌歲大饑體父志罄所藏穀設粥濟饑民食者頌其德抑然謝曰父命也余謹遵行之耳父後病衣不解帶者百夜及卒哀毀逾禮宿柩側垂二年旣葬乃就私寢康熙三十二年邑令高公克藩修縣志紳士呈舉孝行士琳不欲居孝名力辭而止卒年八十有三長子輝由明經任崇義縣學訓陞樂安縣學諭士琳自以父歿奉遺命毋許厚送終戒子若孫歿後勿以輝居官厚喪具懼有加於前也雍正元年詔州縣各建忠義孝弟祠三年祠成知縣黃天球允庠士請以孝子置主入祠并爲立傳俾後人有所考信云



贊曰方大縉義不更娶豈料有子盡孝能使忘其鰥居之苦哉然而有是父不可無是子天固默相之矣士琳竭力事父其至性有過人者傷父之單子而曲體彌摯至驅蠱而蠱不入室所謂誠能動物者耶終身行孝而不以孝名可不謂賢乎哉古來惟孝德之食報綿遠吾以卜士琳之後必昌矣

### 金石庵山人傳

舒慕芬

山人金姓諱孟庚石庵其號也徽之休甯人甲申避亂隨其父行生至靖卜隱於華家山買田築室爲養生計父歿卽葬華家山之陽有弟二人令其歸娶而自廬墓於山間環植山茶木瓜數千本歲取其租以自給有餘資則周鄉鄰之貧乏

## 靖安縣志

### 卷之十二

藝文

五十七

者囊中不蓄一銖敝衣蔬食若苦行老衲在華山中數十年從無暴客之警博通楞嚴諸經尤精韻學山中子弟就學者輒授經書不問修脯於階下鑿一池狀如腰帶中架小橋蓄魚百頭時採山花飼之人至則魚潛伏石庵至則魚爭出就食濠梁之樂不是過也與人語必諄諄勗以忠孝有過輒指摘面折人咸畏敬之卽婦人小子無不知有金先生者余嘗擬造其廬不果後偶入城余始得締交時年已八十矣精神姿態不減龍馬海鶴酒食兼人而天真爛然高懷絕俗令人可親而不可狎蓋孤山逋仙之流亞也自是別去又十餘年矣癸巳復入城請以其田捐入儒學爲義田用購書以詔後

學邑侯李靜齋高其義優禮之且爲之記其事而刻石於學宮未幾還山語所知曰吾願畢矣遂無疾而卒時年九十有奇卽葬華家山表曰金石庵先生之墓

漆世卿暨子澹軒傳

縣丞司徒宜

世卿姓漆氏名懋枋世居桃源里洪州觀察使漆公季高十四世孫也自能言迄弱冠質敏學更富視取青紫如拾芥會其父伯繩睹時事有命戒遂絕志進取爲政門內祇厥父先意承志惟懼不克供子職痛母羅氏早喪事繼母鄒撫二弟至孝且友人言無間家饒給自處極儉約與人交悉以誠梓里中待舉火者更無算嘗曰吾意中非是不適也甲寅歲土

靖安縣志

卷之十二

藝文

五十八

寇猖獗重其才若行欲挾爲黨世卿身罹百楚誓死不屈子澹軒傾家財求贖乃脫於難年八十有三無疾而終

澹軒名瑗字席儒世卿長子幼而英偉有大度稍長與仲氏楚玉季氏殷玉凜庭訓互相砥礪故能有聲賢序事堂上常變悉竭其力歷五十年弗衰年十四時土寇擁世卿去澹軒憤激挾重資挺立賊營贖父賊居奇澹軒髮指厲聲指陳國典罵賊賊膽落遂釋世卿壬午旻赴省試事畢偕其族人長幼皆旋有叔行某中途暘死澹軒伏屍慟哭不忍棄去鼻歸里門晚歲作鶴鳴齋娛情山水間研精易理雅不入城市年六十有八卒卒之曰人皆曰世卿令子亡云

贊曰天道無親常與善人變起倉卒義不辱身冲齡伏寇孝以勇純喬梓正氣千古芳型

贈甘君魯庵孝廉公禦寇傳

教諭易 錕建昌府人

甘棠字觀魚號魯庵靖之東江人也讀書明大義舉元至正七年丁亥鄉科十二年壬辰楚豫間紅巾賊起二月渡江破江州連陷建昌修寧攻靖安人情洶洶望風解散棠則慨然曰維桑與梓必恭敬止父母之邦得不以身先繫邑人望哉遂偕邑進士舒慶遠塗淵胡斗元集議迎監縣潮海號召邑之父老丁壯諭以守禦之義眾共聽之不數日繕兵糧嚴約束募勇取士黃雲爲先鋒推木牛衝戰殺賊數十人會朝廷

### 靖安縣志

卷之十一

藝文

五十九

有詔捕寇衆益愆意爭先蓋自二月至八月戰數捷然以大援不至賊眾復猖獗黃雲戰死令潮海爲賊所執殺於富州先是賊眾合圍時塗淵以請援出迨歸城已破同義者若舒慶遠胡斗元皆以敗散憤激死唯棠與淵存淵仍招徠糾集保全餘民於奉靖界上棠亦力圖恢復每飯不忘殺賊者未竟其志以憂歿云論曰君子所知者義而已矣成敗利鈍詎足以論英雄哉余讀靖列傳名宦若元令潮海鄉賢若進士舒慶遠塗淵胡斗元勇士黃雲慨然歎當時之難起倉猝而其好義也功雖不竟至今數百年下令人感發甘棠本同事獨以舊志偶遺其子孫不能無望而唏噓因爲據所見聞於

靖之耆宿据據其附於潮海宦蹟及胡斗元列傳所可見且合其家乘之所拾遺與注於選舉表名下者爲補其傳如此

舒保齋中憲公逸事

浙江楊 護金 巡撫 人 鑑

舒補亭先生之第五子保齋公者吾女壻之曾祖也故得聞其逸事甚詳多可傳者備錄之以示吾外孫公諱采願字守中派行六天性剛直有膽勇敦信樂義見親交之急難每稱貸以營救之坐是速貧補亭先生既卒於任無一錢之遺公憶及別時庭訓輒爲哽塞慨然曰吾非不能飾虛車獵梁苑榮過其績君子恥之爲貧而仕居卑可也於是棄鄉舉入太學以例除甘肅渠甯巡檢巡檢固卑吏爲之者或降志取容

靖安縣志

卷之十二

藝文

六十

公獨以古道自矢口不名錢遇窮民之訟債者猶往往代償其負堡城有樓頗高敞公手書孝弟忠信禮義廉恥八大字於樓扉之上每與士之知學者吟眺其間爲勸講田渠水利頌聲沸於下而范甌之塵日積矣一武舉龍斷漁利積爲不善受害者訟之則反毆辱訟之者抗不赴質公乃命健役執以來曉之以義則更肆咆哮於是乎伏而答之如律數自檢舉焉上官欲曲全武舉遂寢其事一日郡守之儷過於境屬吏當迎公獨長揖於道左守聞而怒囑縣令劾公之短令曰此強項書生忍饑奉職未嘗爲賣法事也守乃檄公解秋審重犯數十人詣蘭州省而不給長解車役欲因而陷公於

罪或勸公負荆辭謝公曰行矣改委他人亦豈忍移之禍耶於是質衣裘爲囚賃車行兩程而質貲罄囚皆步行桁楊于躓於石則折齒敗面公熱腸冷眼見之心痛呼眾囚而告之曰吾不忍見活地獄欲盡釋汝等銀鐺桎梏悉載吾車吾與若撒手徐行可乎汝曹有罪我無罪諒不忍脫逃累我卽使汝曹皆逃死而得遂其生而我以一身代之死不賢於佛者投身飼餓虎乎於是毅然出匙鑰脫囚枷鎖一時念佛聲沸於泉石公旣以已輿載諸刑具衆囚先後衛之行直險權則扶者囚掖者囚敷座褥而待公小憇者囚囚之慧者往往蕪松枝瀹甘茗愈公之渴如是數日多在烟村斷續中鄰封

# 靖安縣志

## 卷之十二

藝文

六十一

解役猶相接送幸而無恐一日行至六盤山崎嶇萬仞巖無居民隣役亦畏難而止公獨與囚喘息行登未及半而颶風忽作蓋西涼之颶暴於海颶色黑而氣剛飛石如拳擊人面作則長晝如深夜陰霾潮湧干鈞大輿遭之輒覆是日公坐巨樹間囚皆亂竄但聞崩崖折木石罅雷吼如是者數十刻風威漸殺微見星光遠遠聞呻呼則公之御者爲覆車所壓幾折股尋聲往跡則驟伏草中尙無恙而赭衣長髮之囚則無一存者御者曰此天假之緣不逃何待捷足者行百里矣公曰我縱之復誰怨但汝何由下此山御者悲泣正籌策間風際遙聞呼嘯聲稍稍相近御者亦高聲和之則數囚埋面

土中風息而起相與追尋解官也於是囚抱御者置車後扶公坐車前並駕驟而推挽之一里數歇復聞遙呼者執有炬光囚識其面相語曰某斬犯來迎解官也已而果然大抵風夜無行客深山呼嘯聚立而相待者皆死囚也四鼓至山麓去旅店里許更有控蹇驢而相逆者則殺人鉅盜乘之入店按解批逐一點視只少一斬梟重犯衆囚皆謂其罪本十惡必逃矣公不語第與衆相向啜粥荒雞亂號中忽聞剥啄急啟關入之卽律當斬梟之犯也衆囚畢集公望之不覺泣下囚亦泣曰人誰不知逃死樂實不忍累吾佛耳自此公乘驢吟詩囚亦唱山歌相和秦隴多古戰場與志士雄心激成佳

# 靖安縣志

## 卷之十一

藝文

六十二

句甚可樂也至蘭州之浮橋囚皆坐待公後至問何不先行入城囚曰省會官兵多見長髮羣遊公且得罪於是各各向公車自認刑具互相鎖鈕公爲之涕不禁矣公旣銷差不謁客先入監別囚與囚對泣如母別子囚之知必決有老親者求公寄聲言身後之事公一一爲疏於紙歸途必迂道示之其或梟示於近地仍爲之瘞其首焉新疆旣闢地二萬餘里戍邊之將開屯田各以部卒及謫遣之犯引水務農土多沃壤無限制故武職多富其應給軍糧則設糧廳爲收放尖入平出例稱耗羨藉以供差使之費由來已久未設州縣之前其名屯糧廳必揀調內地佐雜之強幹者謂之調口上司擬

調必多方求免至是烏魯木齊呼圖壁糧員缺出而烏魯木齊之遣犯正戕官作亂更誰肯往獨公郡之守方恨其囚之不逃也則僞以強幹有爲薦公調口爲公憂懼者苦勸公以疾辭免或送眷屬歸隻身赴邊公配吳恭人則謂必偕行乃安不可辭辭必遭譴死生有命奚懼焉渠民之送者哭聲相繼咸慮公不生還矣出關七千里始至屯所積雪中人首纍纍卽新殺之謀反賊也逆旅之犬每每銜之人床下人溺著地卽成冰其苦寒如此呼圖壁城戍兵千餘一都司統之守備以下數十員屯田遍野例交文倉收管者若干貯都司屯倉以備徵調者若干餘皆入營員之橐蓋漠外無運道無蓋

# 靖安縣志

## 卷之十一

藝文

六十三

藏民食仰屯餘之蓄歲稷麥貴都司往往盡糶其備徵之糧獲利倍蓰次年熟則補之有餘亦未嘗有徵調也保齋公旣到官與都司同祭武廟都司之拜塾居左公曰文武同城當遵儀注文東武西定禮也爭與讓皆非禮也都司富而驕拂綉徑去公冷笑獨拜而歸自此事事相掣肘且命其軍校尋隙一日有遣犯竊商旅緝得其人拘繫之都司率卒奪犯去公稟提督又不理於是釁益深乃令其營校邏守文倉雖不能不遵例出納耗羨則不許糧廳發糶將窘困之以冀公折腰相求而終不少屈閉糶數年耗糧充棟無所用之幸新疆雜職養廉厚賴以自給一日得伊犁將軍羽檄云吐爾扈特

數十萬募

天朝威德萬里來降

恩旨計口給糧安插之將軍所部數千里將弁屯倉所儲備  
徵調之糧各計若干文到日卽賃駝速運後期者以軍法從  
事都司捧是檄手顫顫目睛上視拊頸曰何不作兵時陣上  
亡耶蓋是年麥價躡起凡諸屯備徵之儲皆糶盡積金雖多  
而千里內外無買處後至之誅惡能免耶憂怖欲死其屬弁  
爲之謀曰長官欲免此劫除是膝行求舒公不念舊惡肯售  
其數年所積耗羨之糧約計已足敷此數且可今日發度不  
後期都司謂彼恨已深應不許弁曰吾觀此人利甚輕而情

靖安縣志

卷之十二

藝文

六十四

重膽雖大而心慈似可誠求禮動也於是都司率羣弁立時  
到門門者入白公方習射於後圃聞之訝曰莫又來索吾鬪  
乎釋弓出視都司望見卽長跪請曰恩官救我再三掖之起  
而詢其所求旣知所急慨然曰勞君數年爲我守方有此積  
我亦豈乘人急者夙怨旣銷新歡伊始我非求利君但憑心  
事不宜遲今盡以管鑰相付卽自量自發以成數報我可耳  
都司之驚喜又出望外不逾刻而駱駝之聲喧於廩矣公第  
照時價受其樂輸都司之感服盛德又無異赭衣囚也公旣  
屢歷夫生於憂患之境信道愈堅爲義彌勇卽寓書於族尊  
老爲長伯立繼卽以身所受一夫之田輸爲繼產預爲納監



名繼祖以成父積俸繼兄之志族議遂以公五兄嗣小宗焉  
當是時金川未靖

詔許運糧餉軍者敘勞授官公於是諭長男襲亭曰吾既受  
國恩司糧獲羨不可不命汝報効

朝廷次年得議敘同知加二級

誥封保齋公爲中憲大夫公五兄遠遊甘肅歿於山丹訃至  
公製服爲位而哭祭如禮卽具文告病且啟云職兄爲視弟  
而疾歿於途必當親往護喪歸義方無歉諸大屏漸知公才  
皆不准則又陳情辭益切書七上而始獲允給回籍咨矣數  
年來塞外貧交多謫戍而無依可愍者公取橐中三千金酌

### 靖安縣志

#### 卷之十二

藝文

六十五

情分贈而後別徑至山丹啟兄厝加外棹身護行萬里歸葬  
靖安始買宅豫章城南自題其堂曰忠孝以敬志父之遺命  
因老屋有兄弟居也旣而公長子除廣西慶遠郡司馬攝永  
甯牧迎養父母歲己亥公疾終州解年五十有一竊嘗讀公  
第三子白香廬山日記七月廿一所記公仙還諸異及聯壁  
詩鈔慕庭公跋而歎雙溪兩賢孝友之德源固遠而流未艾  
也吾外孫可不勉哉相傳公在塞外一夕行商叩關報羣盜  
肆劫公卽乘馬率弓兵出救射之使逃賊盡獲時公極貧索  
郡統憫其向隅特以監照百紙發公備賑公不受且稟繳謝  
十年之後口內外監糧冒賑之案發而公獨得免非先識乎

夫見利思義見危授命人要不平忘平生之言聖門亦可以謂之成人保齋公生平逸事力行過之詎可以其官未顯沒其傳也

舒賢婦傳

知縣鄒朝陽

孺人姓陳氏邑候選司訓舒君質之配也陳本邑望族孺人父士禮家素封有女二人孺人其次性清淑嫻書禮在室弗慕華飾猶時時隨母習女紅父笑謂吾家非乏衣食何自苦乃爾對曰兒聞古之賢媛在貴猶勤兒何敢惰父奇之年十九歸司訓能敬以事其舅姑和以睦其娣姒慈以惠其卑幼又能操持家政不令司訓勞是時司訓方銳意為學早夜不

靖安縣志

卷之十二

藝文

六十六

輟體羸善病藥鎗之勞始無虛晷歲在癸亥司訓疾亟岐黃家皆以為不治孺人計無所出乃遂默禱於天潛引利刃割股和餌以進翌日疾竟瘳始察知狀大慟稱婦賢隣里同傳頌焉孺人初不欲令人知也先是孺人有弟鵬早歿無嗣父亡後孺人請於其族老得昭穆相當之雋者立為嗣其母乃命嗣孫曰爾祖辛苦起家所以貽爾者厚矣爾諸姑昔年賞妝薄其各撥田租百石以補奩贈剖券給之孺人與司訓堅辭不受於是聞者益嘆孺人之賢而明義知其後之必大也舒君由廩生充貢授職司訓孺人例當封卒於乾隆癸巳二月年五十有八子一碧增廣生孫二家驥星符幼學有聲雙

溪院長舒君茗原孺人之姪也予因茗原熟聞孺人之賢遂  
本其行畧而爲之傳

論曰古者女史採閨壺之懿行紀之彤管俾後人有所觀覽  
亦內政得失之林也彤管湮姆教熄矣剖股療疴始於張密  
論者以爲畸行儒生或弗傳然閨中弱質白刃如飴自甘剗  
體裂膚流血殷地而不顧不賢而能之乎至於却千金之產  
又何介也古人有言能使貪夫廉懦夫有立志不出巾幗而  
遇之矣

余善士傳

知縣 張龍占

稽古鄉飲酒禮所以尊德尚齒禮至重也予蒞靖邑公餘進

靖安縣志

卷之十二

藝文

六十七

紳士而咨之曰邑中有樂善不倦者乎眾推余君从英而予  
未嘗見也心儀之明年奉檄舉鄉飲謀之紳士卽以余君請  
予固知余君之爲人稔且悉亦以爲無出其右者而君乃固  
辭謂德涼不足以副盛典強之堅不就予更心敬之而惜未  
見其人也及行田野間見路無崎嶇之險誰修之曰余君也  
見長橋安坦無泛涉之病誰成之曰余君也未幾學使者檄  
下脩府屬考棚余君率先爲邑人倡葺事學使以其名勒諸  
碑嘉其尚義以示後而後知余君之固辭鄉飲者務實而不  
務虛名也詩曰金玉爾音而有遐心其余君之謂夫聞其風  
者可以蹶然起矣

舒椒窗中憲公傳

福建臺灣道

徐宗幹

南浦人

公舒姓諱慶元江西靖安人也其長子化民與宗幹僚友交契述其先人言行甚詳請爲立傳誼不當辭按公祖籍皖江宋紹興間任隆興道儒學提舉世昌公樂靖安風土致仕後遂家焉高曾以上潛德弗曜父述庵先生以質行顯於鄉列縣志處士傳生二子長卽公次諱啟鵬公性敦厚有父風篤於孝友讀書必求體要旣壯始補縣庠屢躋鄉闈絕意進取留心經世有用之學以及百家衆藝之書擇其精要者錄成帙不以示人曰吾以訓子孫耳家故不豐饔飧俾給儉約可風遇困乏親鄰必竭所有餘以助之課子家塾兼附童蒙不

靖安縣志

卷之十二

藝文

六十八

計束修多寡嘗述陳勾山太僕言曰施乞丐一錢課村童千字皆立達中事吾取譬於是而已人咸以爲長者輒來索貸則又審其賢否緩急而不輕予謂不能以己所不敢用供人所不當用氣度温和雖習與相處未見其有愠色與賓舊歡讌豪於飲無酒失丈夫子四教之以義方長子丁卯登鄉薦丁丑大挑官山東宰費邑長清皆迎養公每勗曰六事廉爲本然吏之廉猶女之貞皆分內事不足異惟擇有利於民者興之有害於民者除之勿喜事亦勿畏事實猛得中設誠而致行斯不愧爲民父母居久思歸又曰宦途升沈有命母逝名毋希躁進循吏可爲勉之吾歸矣厥後長子以循聲上達

由州牧擢郡守監司皆恪遵庭訓而諸子佑民俊民儀民亦以仕職儒官世其家學知沐浴於家教者深矣晚年愛種菊嘗繪晚香圖以自娛既歸里開敞廬儒素含飴自樂每夜坐時與子若孫講持躬處事及古今成敗奢儉興替之由以爲勸戒卒年七十有五以子貴封贈如官階公蓄德積學雖困於科舉言行不顯於世迹其訓子數語官箴治譜體用咸駭具見抱負終膺再命之榮洵所謂晚香矣爰書其犖犖大者以俟後之觀風者採擇焉

銘碣

唐

靖安縣志

卷之十二

藝文

六十九

寶峯馬祖大寂禪師塔銘

同平權德輿洛陽人

鍾陵之西曰海昏海昏南鄙有石門山禪宗大師馬氏塔廟之所在也門弟子以德輿嘗遊大師之藩俾文言而揭之曰三如來身以大慈爲本六波羅蜜以般若爲鍵非上德宿植者惡乎至此大師諱道一代居德陽生有異表幼無兒戲疑如山立湛如川渟舌廣長以覆準足文理而成字全德法器自天授之常以爲九流六學不足經慮局然理世之具豈資出世之方唯度門正覺爲上智宅心之域耳初落髮於資州進具於巴陵後聞衡嶽有讓禪師者傳教於曹溪六祖真心超詣是爲頓門跋履造請一言懸解殆類顏子如愚以知十

俄比淨名默然於不二以法惟無任化亦隨方嘗禪誦於撫之西裏山又南至於虔之龔公山攫搏者馴悍戾者仁瞻其儀相自用丕變今河南刺史尹裴公从於廩奉多所信嚮用此定慧發其明誠大厯中尚書路公冀之爲廉帥也舟車旁午請居理所貞元元年成紀李公以侍極司憲臨長是邦勤護法之誠承最上之說大抵去三以就一捨權以取實示不遷不染之性無差別次第之門嘗曰佛不遠人卽心而證法無所攝觸境皆如豈在多岐以泥學者故夸父喫咭求之愈疎而金剛醍醐正在方寸於是解其結發其覆如利刃之破胸索甘露之灑稠林隨其義味快得善利者可勝道哉此緣

靖安縣志

卷之十一

藝文

七十

既周跣趺報書時貞元四年二月庚辰春秋八十夏臘六十前此以石門清曠之境爲宴然終焉之地忽謂入室弟子曰吾至二月當還爾其識之及其委化如合符節當夾鐘發生之候協拘尸薪火之期緇素幼艾失聲望路瀆涸流而法雨滂灑及山門而天香紛霽交感之際昧者不知沙門惠海智藏鎬英志賢志通道吾懷暉惟寬智廣崇太惠雲等體服其勞心通其教以爲吾師真性湛然與虛空俱爲是體魂化爲舍利則西方之故事傳焉不可已也乃率顛其徒從茶毘之法珠圓而潔煜耀盈升建茲嚴事衆所瞻仰至七年而功用成竭誠信故緩也德輿往因稽首粗獲擊蒙雖習鳥在空莫

知近遠而法雲覆物已被清涼今此銘表之事敢拒眾多之請

銘曰達摩心法南爲曹溪南門巍巍振拔沈泥禪師宏之俾民不迷九江西郛爲一都會亦旣戾止元津橫霈慈哀攝護爲大法礪五濁六觸翳然相蒙真心道場決之則通隨器受益各見其功真性無方妙道不竭顧此夢幻亦有生滅微言密用煥炳昭晰過去諸佛有脩多羅心能悟之在一刹那何以竄哀茲宰堵波

附雜銘

國朝

靖安縣志

卷之十二

藝文

七十一

道源泉銘

并序

李紀

余旣與闔邑紳士建立泮宮因鑿泮池而慮壁沼之難於水也慨然嘆曰美哉斯廟之孔碩也惟泮不及泉卒爲汚萊斯亦事之遺憾者矣因於鬢門之下約數十步叩地而祝曰泮於斯泉於斯眾訝然異謂是信有泉耶乃召工具畚插鑿於其下未尋而液未丈而溜及泉而湧自西北感沸而出有泉二本若聯珠然更決而南得古石井濬其淤塞通以原竇出而與二泉交滙三泉合流汪洋渟蓄不竭不盈真可異也聞之聖人之道如水行地中無往不在又曰淵淵其淵靜深有本是道之時出不窮如水之流行不息茲泉之所以特出者

非會逢其盛而應德效靈歟其潛也如遜其見也如期深以蓄其德高以下其施其爲造道之君子而左右逢其源者乎若以爲沿得靈泉人文兆啟占驗之說姑且勿論因顏之曰道源泉更爲作銘

銘曰天一所形厥質乃凝盈科習坎與道俱行天下文明地不愛寶醴泉湧出潑洞芹藻山后川君與道爲謀道隨時泰慶與泉流流謙潤下潺湲皎潔用之日新取之無竭泗水載靈激濁揚清雙溪接潤水德惟馨睿視無涯靈襟不測尋源探本千古一脈酌不盈杯清絕塵埃圓橋觀聽盡洗靈臺

贊

# 靖安縣志

## 卷之十二

藝文

七十二

况太守像贊

鄒坊楊溥

剛毅之氣端肅之容處心以正行事以公稟龍岡之秀氣當盛世之竒逢立身行道顯祖揚宗論事聞蹇蹇之直待賢見温温之恭拜官於儀部也秩然上下之禮出守於蘇城也綽乎撫字之功仕歷四聖名聞九重兩鬢添憂民之白髮一心持報國之丹忠宜乎加官增秩而祿位功業之益隆也

陳烈女贊

大學 劉定之 永新

女旣從夫義無改離旣許未從雖改誰訥猗嗟貞女玉潔金堅心相許時所期終天重泉幽室捐軀遂志肯復結襪謂他人壻秋風穿木連理交柯有鳥並棲深映女蘿垂光彤史永



貽女則匪女孺然亦表臣節

宋

舒雙峯先生墓誌銘

學士李大異新建人

舒邦佐字輔國更字平叔別號雙峯隆興靖安人曾祖達先  
祖機父茂公資性穎絕少讀書過目輒解學聚問辨日啟歲  
益卓然有成初以辭賦絢麗見推先達值朝廷兼設經義詞  
賦科益討論墳典求爲有用之學蜚聲文場亟預賓選登淳  
熙八年進士初授鄂州蒲圻簿會有旨并簿與尉爲一改潭  
州善化簿公謂朱墨勾稽一不謹審則推科重複蠹弊叢生  
乃悉心清釐日力不足繼之以夜吏姦爲之頓銷長沙輸送

靖安縣志

卷之十二

藝文

七十三

苗米蹶三十萬斛郡委公與戶掾李公肅領其事區處合宜  
未嘗多取其贏民皆德之有今年官米兩平量之謠蓋語實  
也公每晨起受輸送逮暮乃罷凡所需微物下至烏薪亦攜  
以自隨郡以每歲輸納例有所餽號曰優潤錢公舉而寄諸  
縣帑其後公將瓜代復有所贖公合所得悉返諸縣以簿解  
圯毀請留爲繕修費潭人皆服其廉甯鄉告旱連帥潘公時  
知公賢貽牒專委之是時官疑訴者失實徧諭諸鄉訴不實  
許人告民懼俱不敢訴公白於郡寬首告之禁由是實旱者  
乃敢有辭連帥避之用薦書授文林郎調衡州錄事參軍公  
以明謹用刑哀矜折獄人皆稱之嘗有欲鍛鍊者公曰吾不

能爲阿曲但當穿屣以歸耳時囚繫者或以饑寒瘦死獄中公命爲衾稠飲食及禦寒却暑之具靡一不整有茶陵縣倪氏子訴胥長譚良佐受賕逮鞠正則嘗許而未受守倅臨問將併訴者罪之公言吏蠹易滋民寃難伸於是訴者得從末減未幾祥刑使者因闕積牘見公辨論之語深賢之乃併縣胥郡吏皆置於理有宗室子繫娼優於邸舍而誤入主人之室破其寢帳什器廂官白於郡以白晝持杖之罪罪之守怒將聞於朝公言其情本出過誤且無賕可證竟從寬典嘗攝憲司檢法官又攝郡僉幕皆著勞績有翁姓兄弟訟分財不平憲以成案委檢法詳閱之公得其實感諭以天性皆頓

# 靖安縣志

## 卷之十二

藝文

七十四

首服憲命牒旁郡爲矜式時郡議蠲民賦公言某鄉蠲若干某戶蠲若干當具數揭諸通衢其合蠲已輸者許豁新賦庶民得霑實惠郡從之遂爲例公在衡時諸部使者多以案牘委公審訂公酌以情法凡所擬定後莫能移聲華燦然刺史暨部刺史皆以薦書聞時丞相京魏公長憲部亦卑剡牘僉謂公當卽通籍尙書銓平步清華矣紹熙甲寅歲忽得末疾二女一孫皆刲股以進連帥朱文公以其家孝友欲達於朝予以祠祿公先夕夢謁嚴陵釣臺留詩有倒翻江水洗塵顏之句慨然有感乃力乞還山文公賢而從之買舟西歸從容三徑文史自娛手錄皇朝數巨帙不以利達縈其胸次仿范

希文設立義莊以贍鄉里建望煙樓於天澤池上見有斷炊者立周以錢粟邑舊有學田爲豪家侵佔稅官權酷多非法橫索公皆力爭之得復其舊蓋愛人濟物自其天性然也公蚤負盛名自膺仕籍當路往往以牋奏屬之是時周丞相益公永嘉陳紫微皆重公之文行褒稱不置於口其與公爲文字交並有時名者則孫從之吳仲權諸人也余於公有鄉里之誼雖仕宦相望南朔不通款密然於公之文則平昔固已嘗鼎一臠窺豹一斑而公家所彙雙峯猥藁者則手之而不釋也蓋嘗評公詩溫潤而縝密雋逸而清新如太羹元酒素有典則如瓊杯玉斝爛然可珍所宜徑上扉掖小郤猶當在

靖安縣志

卷之十二

藝文

七十五

蓬山璧水間位不滿才爲之嘸嘆然公之爲學先道德而後文章生平得力在退爲進基靜爲動主二語朱文公亟稱許之或出或處綽然洞見本原也嘉泰壬戌歲公以致仕授通直郎明年合宮肆霈錫服朱銀嘉定甲戌歲十二月八日公震夙之旦也子姓皆舉觶爲壽情意懽然上澣之日忽語子孫曰吾將逝矣以十二日終於正寢享年七十有八公處生死之際凝然不亂聞者以爲學力致然娶閔氏夙有壺範男四長迥早世次選肄舉子業有聲次逸邁俱待補上庠女六人長適進士劉允中次適向之武次適張緒次適進士鄒鎬次適登仕郎王九思次適鄉貢進士袁允中孫男十六人峻

熾辛甲嶧兌庚崧崩壬癸餘未名峻辛甲俱待補上庠熾與  
癸酉歲計偕孫女七人曾孫男八人相鉉楫模餘未名曾孫  
女十人公自爲壽藏於福壽之源諸孤將以嘉定八年九月  
庚申奉柩闕幽窆公之次嗣選以檢正胡公所書行狀來請  
銘余於公夙懷緇衣之心不敢以蕪陋辭乃序而銘之  
銘曰嗚呼平叔文高於今世行儼於古人涖官行已學出以  
醕使其踐登樞要固當資啟沃而贊經綸德豐位賈遇合奚  
論惟有清芬之澤方將大其家世昌其子孫

明

禮部尚書李公墓誌銘

編修 蘇伯衡

靖安縣志

卷之十一

藝文

七十六

公諱叔正字克正原名宗頤姓李氏系出唐宗派越敬公武  
氏時公之裔貶斥海隅傳十餘世於後周顯德間徙廣南占  
籍四會歷五世爲宋翰林學士殿中侍郎諱積中者以元祐  
黨籍謫江右因家豫章元季喪亂避地靖安故今爲靖安人  
公爲朝散大夫通判贛州府事諱宏規之曾孫從仕郎知郴  
州宜章縣事諱以能之孫將仕郎諱福組之子母師氏而公  
曹氏出也生之夕將仕君夢異僧以金盤藉嬰兒入臥內驚  
寤以告師夫人夫人夢亦如之故幼名佛授六歲而孤鞠於  
師夫人聰慧絕倫聞警者唱野史入告夫人曰兒能記之令  
試焉數千言一字不遺也旁觀稱嘆曰神童神童年十二以

能詩聞於州里常和人機拂子歌有安得直上掃碧空母使  
浮雲翳明月之句咸以遠大期之稍長慨然有四方之志語  
人曰丈夫安能螿終田舍耶乃游學外郡凡性命道德之書  
天文地理之說下逮諸子百家無不畢究三十贅於新建夏  
氏五世祖文惠公故第在修仁坊歲久多傾圯竭力修繕正  
寢東廡工甫訖長兄欲入居立推讓之更葺西廡謀自外氏  
遷歸忽一日心動晨夜馳還靖安則母師夫人臥病已數日  
見公挈婦還喜而愈踰年病復作公與夏氏左右侍奉累月  
不解衣帶湯藥非親嘗不以進及歿哀毀如禮諸兄惑於陰  
陽家言停柩在堂數年公涕泣告曰如是則無葬日欲子孫

## 靖安縣志

### 卷之十一

藝文

七十七

之福利而親之體魄不得安何忍也兄感悟乃獲畢葬事服  
闋游郡城一時知名士若定子進辛好禮周伯甯練伯常劉  
原善陳維辛蕃與公共十人送抱推襟吟壇文讌無虛日士  
林號爲十才子云再就試不第是時東南方多故乃深自韜  
晦杜門不出會皇朝肇造初年以人才舉徵辟至南京擢國  
子監學正分教正蒙齋時貴戚公侯子弟肄業時習齋多不  
服約束許祭酒存仁乃以屬公公至齋正襟危坐嚴立程課  
貴游驕氣自戢越五載魏杞山爲祭酒表上其成效乞署博  
士上曰李宗頤朕將用之令歷試州縣遂遷渭南丞諸生戀  
戀不忍去追送龍江之上垂涕而別洪武四年夏秋渭南大

旱去縣四十里有龍湫在南山之上公冒暑徒跣禱焉雨隨  
作然尚不能徧渥詳請大府蠲除民租又乞預貸麥種歲稔  
而免流離皆其力也初同州與蒲城爭地界累官莫能決至  
是委公公探知同州里胥常奪蒲人麥輸夏稅而蒲城所爭  
之地亦有隱匿單騎至其地立判數語交答之兩地人惶恐  
謝罪願中分所爭地數年之訟一朝而決自是隣境有疑獄  
皆委公訊斷焉渭邑歲輸糧二萬而田無定額多田之家輸  
少而田少者輸多公乃責社甲履畝丈量立法精密豪右失  
計無所飛詭則田成賦田出於舊三倍民征用寬公私交便  
關東飛蝗入境若陣雲蔽日而東公親臨捕之隨散隨集所

靖安縣志

卷之十二

藝文

七十八

過輒遺種類乃令民於古渭水濱掘坑其下岸陷而井深螭  
子跳踉不能上輒墜其中畚土實之以此蝗不爲災嘗有虎  
患白晝輒郊外食人縣東有周處祠公投以文云昔將軍之  
爲人能除三害今何爲不一殄虎狼耶不然廟豈不爲神羞  
耶其迹遂屏是冬移知興化初視事端坐默視丞簿意公無  
能爲遇事操縱自恣且半月公徐徐曰前某事當某事不當  
聽訟必準情酌理幸共勉旃皆大愧服不敢擅八年春夏大  
雨高郵湖水盛漲災被三州二縣守長莫肯上聞公詣州白  
守曰水勢如此常稅必無所取有災而不告是欺君也民遭  
水又從而征之是虐民也守不得已乃具牘上請猶欲檢覈

公抗言方今百里之地高下遠近無非水者非惟不必檢覈亦不可檢覈册上朝議以水災在去年春何今年始以册報鄰邑以檢覈請者皆罔上治之興化獲免三載入覲考功稱最轉禮部員外郎尋以病乞休不許除國子助教又明日拜監察御史奉命巡嶺南有瓊州府吏許其守踞公座僉表文公廉得其實曰守之誣而抵吏罪覆奏上嘉之曰人言老御史懦乃明斷如是耶出爲湖廣左叅政敕運杉木二萬期以二旬達京師公卽購備如數遣吏督運未半月而至又給運饋餉萬大挽舟上巫峽無悞期轉左轄以禮部侍郎召還十四年正旦行大禮公宣讀表文聲音朗暢尋陞本部尚書階

# 靖安縣志

## 卷之十二

藝文

七十九

資善大夫二月上丁隨駕陪祀文宣王五月奉册命封皇太子妃禮儀悉中冬甘露降蔣山率百官表賀上顏大悅方以天下日躋昇平祥和示兆鼎鼐鹽梅將倚公如左右手乃以積勞成疾於是年某月某日薨於位事聞天子震悼賜祭葬距生於故元延祐五年戊午歲某月某日得年六十有四後四年甲子葬於靖安大梓都之原娶夏氏宋平章文莊公六世孫女以僞漢陳詠陷南昌時自溺井中不屈死公義之不再娶子一人懋女二人一與母俱溺死一適舒景南孫男二人興孫甯孫伯衡曩與公同事太學知公最深故因其孤之請遂濡筆而爲之銘

銘曰李氏之先組綬蟬聯餘慶所鍾篤生象賢象賢之生夙  
有令聞孝友之行根乎性天方其盛年山澤棲遲抱厥蘊蓄  
以俟乎時聖神龍興聘而後起學既無競政亦有偉其學維  
河六莚三墳弁包無遺蜚英成均振揚教鐸模楷貴胄有德  
有造以及俊秀其政維何既疇民庸乃陟郎署乃達帝聰出  
膺方鎮德布令施入躋從班獻替論思仲尼之門政學殊科  
二者克兼自古不多公兼其二允矣不器國之楨榦惟天子  
試人方望公謀謨廟堂天不可必奄焉淪亡僚友作銘勒諸  
墓石悲雖有餘辭則無愧

贈正議大夫資治卿加正三品銜蘇州府知府况公墓

# 靖安縣志

## 卷之十二

藝文

八十

誌銘

侍郎王

直泰和

正統癸亥夏靖安况公子甯遣介致言於余曰先大夫卜葬  
有日矣憶先大夫生平居址相隣職業相勵以石交稱者宜  
莫如先生其庶錫之誅銘以責泉壤光竹冊可乎藐諸孤伏  
苦次待命余曰唯唯茲固誼不容辭者也公名鍾字伯律姓  
况氏其先世居况坊有封爵至公侯者分支靖安再傳而死  
於寇且以家殉公父仲謙甫數齡鞠於黃氏仲謙篤生公子  
遺之際慨然以讀書經世爲務起家儀曹尋歷超遷非卓然  
名傑其能若是乎夫儀曹所司朝廷大典禮也必宏儒始任  
之公以新進少年周旋兩京明於掌故而動合章程爲聖主



所眷注則公之才優學博可知矣天子擢用賢能牧雄劇郡  
公以保薦獨得蘇州公之才力過人爲朝堂所信服又可知  
矣公慨然攬轡登車勇於任事糾官懲吏邪織弊必剔積  
困必甦前後爲斯民請命如減額除荒諸大政抗疏至數十  
上懇直無諱而上嘉納之數年間民之疲者以興窮者以植  
逃亡者以復貪黠者屏息而不敢肆油油然樂生送死非復  
向來苦重賦而呼籲無門之氣象矣民相與咏歌膏澤比屋  
皆然稱之爲青天爲父母無怪乎丁艱則求起復任滿則乞  
保留不呼而集伏闕而請借寇者踵相接而不能絕也公始  
受知於邑令俞益早以孫伏伽張元素期之逮典郡政成羣

## 靖安縣志

### 卷之十二

藝文

八十一

以龔黃頌之晉秩留任楊相國致詩則以趙清獻張益州方  
之要皆爲公實錄而非出於過譽設天假大年其勲業正有  
未可量者然已無忝社稷臣之望矣循良云乎哉公生於洪  
武十六年卒今正統七年享壽六十由禮部郎知蘇州府陞  
按察使職俸誥封中議大夫贊治尹贈正議大夫資治卿公  
應得諡惜未有以是請者誠闕典也娶熊氏續娶王李舒萬  
四氏並贈恭人子五甯寰賓宇守女二孫泮沐滌共二十一  
人公葬邑之神州山當公薨於蘇余旣爲文哭奠之今復得  
誌其墓而銘焉

銘曰天生豪傑必有所爲罹患之後崛起門閭黼黻典禮出

守吳畿起衰剔弊德澤覃施萬民樂業衍衍怡怡未登臺輔  
喬木頤頤慶貽後裔食報匪遲崇岡翼翼哲人此居

塗鳳韶墓誌

祭酒 邱 濬 瓊山

公姓塗名鉉字鳳韶號屏山按其世系乃塗山氏之後在漢  
塗暉爲諫議大夫與王璜同受毛詩於孔安國唐塗曉爲江  
州刺史廉能可述號金聲玉色至宋仁宗時其祖諱忠者先  
居豫章嘉祐七年由鄉貢進士官主崇文院校書後爲汝  
判晚年致仕徙居瑞之高安雲石子諱居仁受業於西澗先  
生劉凝之崇甯二年授開封府少尹後陞都轉運使致仕子  
諱近正號明倫居士少從遊於寶文閣學士胡康侯比壯博

靖安縣志

卷之十一

藝文

八十五

學多聞深明義理著明倫集十篇行於世與朱文公小學相  
表裏實有功於風教生子五由是子孫蕃茂簪纓蟬聯後先  
相望長諱應楠嘉定四年由進士授郴州貴東縣丞陞臨川  
倅改秩運漕子諱幼醅成進士贅靖安舒氏遂家焉而爲靖  
安始祖初任瀏陽簿以功陞吉州倅晚年致政倣范文正公  
義莊之規置義田以給族名傳典籍子諱泰亨登進士第初  
任著作郎歷陞端明殿學士泰亨生敬翁仕元任廣東翁原  
縣尹遷今慶源里敬翁生好古隱德弗耀好古生益可才德  
兼備遭元末兵亂未仕生子伯琦伯琳伯璣兄弟名重鄉里  
伯璣卽公考也公從兄鏗伯琦之子少與公同講學永樂間

中陳循榜進士任貴州道監察御史有憲度著能聲公爲人寬厚謙恭博通經史至於地理選擇推卜之類無不諳曉居家以孝事親以和睦族處鄉黨朋友以忠信無僞遇荒歉尤樂於賙給鄉人德之宣德間有司以賢良方正薦不就後舉爲陰陽訓術又不屑惟樂邱園自娛嘗訓其子淮曰汝蒙朝廷作養幸登科第食天祿官之大小係乎命守之一字在乎已當盡忠報効毋戾祖訓已而居官著廉能式勤慎天順間聖天子推恩赦封爲承德郎工部主事與子同官凡三娶子若干孫若干公生於洪武丁卯十二月二十日卒於天順癸未四月十八日停柩于堂成化丙戌季冬十七日奉柩葬於

# 靖安縣志

## 卷之十一

藝文

八十三

大梓都洪屏山爲墓首寅趾申越十載時予承乏國子監祭酒達夫守蜀之順慶以公行狀走書來京求銘於余曰孤之先人雖已葬孤冒不孝之罪因循未有銘歲遠泯沒先人之德願一言以昭後世予與達夫昔同游太學同登進士第文得侍同朝相知最深是以知公之世次行實乃序而誌之

陳東窗先生墓表

司業 張位 新進人

東窗先生者上元令陳君文之父也先是陳君令崇明業已贈先生文林郎比涖上元復加贈先生承德郎令甲凡外任者必三載奏績乃得貤封其親而三載內非經御史臺使者兩薦則弗能得其兩京官恩封亦必俟其滿始克授非際非

常之遇未有遽得之者甚者位陟通顯而所親一命竟未沾  
往往有焉蓋其難也今陳君在崇明時以治行高等屢薦而  
得之逮擢京邑又遭逢兩宮尊稱徽號錫類覃恩一歲中兩  
沾渥典真異數亦奇遘哉先生諱大鴻字文翔一字漸之南  
昌靖安人其先出江州義門之後宋嘉祐中奉朝命遷移修  
甯馬跡村元季有應澄者令新吳娶靖安羅少尹女愛靖安  
多佳山水遂占籍焉應澄五傳至伯昇爲文學弟子員則先  
生父也文學治尙書數試有司不售則去博士籍專務以德  
化人歲大祲發粟賑餓人里中待以舉火無慮千指焉瑤賊  
起焚掠近文學里弛兵而過曰無驚陳有道也文學視諸子

靖安縣志

卷之十一

藝文

八十四

中先生特穎異於是以書學授之尋值鄉間寇亂先生間關  
竄避比歸齒已長乃稍稍問家人生產家益裕居恆自念吾  
父手挈藏書而授之我顧阨於多難不能卒讀父書誠願有  
以恢宏先人之業是在孺子乎於是開館舍延名師以訓誨  
三子日程督之季子女果以尚書舉於鄉先生乃邑喜自是  
不復入城市飭一切家政勿得有所關白卽縣令屢以賓筵  
請固謝不往獨坐一小樓焚香點易偃息其中自稱曰東窗  
懶人文三上春官不第先生自以春秋高數語文卽使若終  
博一第吾宰木拱矣文受命謁選得黃梅學教諭黃梅距靖  
安四百里而近於是迎先生與配孺人養於學舍明年己巳

先生年七十靖安諸生以先生齒德巍碩白所司應詔賜爵一級表其廬明年文校河南試事尋擢昌邑令明年先生卒於家時隆慶某年月日也距其生於宏治某年月日得年七十有二文葬先生本邑迴寶北莊先生配晏氏生三子長豪次奇幼卽文孫男且十有一人其五已爲學官弟子並有文譽語曰不於其身必於子孫先生之謂乎先生生平篤厚人倫伯兄大鵬先生直父事之仲兄大鶚無子則以次子奇爲之後主含襚棺槨盡倚辦先生追復祖所遺贍學田若干畝以給宗人之業儒者又建學塾於宅右翼人子皆得來受學嘗修家譜若干卷蓋繁陳氏之望者數十年鄉人修縣志采

靖安縣志

卷之十二

藝文

八十五

其行事列之逸民其詳具新安汪司馬志中嗟乎以余耳目覩記逮父老傳聞凡鄉閭之顯融昌熾者必其先濟物能施者也其隳廢蕭條必其先虧人利己者也方其與之也非意於取之而天道之報施每溢於其初方其取之也固欲其長有之而天道之奪削者恒越乎意外則爲身家子孫計者宜知擇矣至其爲子孫者食報受祉率忘先人之志仕肥剝民家肥剝里乃不一傳而傾覆倍之則取償溢分斯其所失更大也今觀東窗先生贍族賑鄉之事諄諄行仁義不爲厭怠是所遺於後人者無涯而陳君兩仕巖邑赤縣冰檠自持政以惠民澤物爲務蓋體先志而益恢宏其施焉卜陳氏之垂

裕無窮也余特表而出之以爲作善者勸

明中順大夫嘉興府知府舒公墓表

呂原

公姓舒氏諱敬字守中號謙益南昌靖安人也其先世自安慶淮甯一世祖達先因提舉江西儒學往來見山水之勝遂家焉四世祖邦佐宋淳熙辛丑取黃山榜進士衡州錄事叅軍官至通直致仕門人號爲雙峯先生有雙峯稿存於家高祖廉夫爲時名儒號平山吳草廬先生銘其墓足徵矣曾祖達可祖慶善皆以耕學起家父有常由求賢授丹徒令改永春復歷休甯富順知縣在在有聲致政以公貴贈承德郎兵部車駕清吏司主事母贈安人生有子八其二子也公少穎

靖安縣志

卷之十一

藝文

八十六

異甫六齡能屬對稍長從師授尚書年十五六舉業成以待父寓官所因應試天鄉闈不遇乃還遊靖安縣學永樂甲午領江西鄉試中乙榜辭入南監歲辛丑始登進士第得依親歸乃益治經史旁及百家子氏皆博涉而通之值母喪居憂宣德壬子至京授刑部浙江司主事又值父喪歸正統己未改兵部車駕司公初在刑曹鞠獄明廷允有能聲會朝命將官禮及刑部侍郎魏源討江西叛寇奏以公偕往贊畫良多凱旋沐白金之賚適外番獻麒麟奉

詔賦詩公居優等賜鈔六十錠及居駕部屢承

旨閱宣府諸處防隘處甚當歲丁卯兵部尚書廊楚翰林院

大學士陳循謂公優有治才薦知嘉興府事胸次洞達自下  
車民情吏弊周知曲盡尤善發摘惟務興利祛弊百廢具舉  
俄盜起處州

朝廷發兵往捕 藩臬亦檄公率民兵駐金華以拒賊衝殊  
有威望竣事還府篤意宣化重新學校又以釋奠宣 聖用  
樂器數雖存鮮有習者特延知樂者教肄於是樂之音容始  
美又以陸宣公有廟而無官祭無以表忠勵節請於  
朝得官給錢以供歲事公於政暇輒詣學課諸生講道藝肆  
禮樂且數與儒官宴會從容咨訪得失一時文物之盛縉紳  
莫不羨焉一日公與鎮守者不相能誣公以事公詣 京師

## 靖安縣志

### 卷之十一

藝文

八十七

而憲官分辨既明還官公乃嘆曰吾求無心足矣安能戀戀  
於此耶遂辭歸以適桑榆之樂公平生篤於孝第尤嚴家祀  
凡謁祠堂匪蕭衣冠不敢入匪預齋戒不敢祭家素積貲而  
喜周貧賑乏鄉父老當尊敬者恆以酒肉饋之既歸榮田園  
益修葺祖業課僮僕耕稼以自給而凡親賓造門者必治具  
款留豐約隨所有無毫髮厭怠意歸逾三年忽嬰微疾自度  
必不起召諸子謂曰吾有三事祖母墓碣未立當成我志喪  
葬勿用浮奢當依古禮呂內翰知我當求其銘汝輩毋違茲  
命言訖端坐而逝時天順戊寅八月十二日也詎其生洪武  
壬申六月六日春秋六十有七配安人章氏奉新處士文用

之女莊淑而慧治家有法子男五璣輸補官次琥國子生瑛  
及璉早世又次日璧璣璉璩璧娶帥陰彭劉璉娶高安陳  
氏聞璉卒自縊死有司爲請表於門孫男十三人鑑鈺鏗錦  
銓欽鎮鋼銳鈿順孫立孫成賢曾孫男五人諸子旣以庚辰  
十二月葬公於忠夏都白石尖下中崙南出之陽而以遺命  
具狀馳書請表其墓嗚呼原誠知公不可以不敏辭也爰據  
狀書之而系以辭曰豫章之英聳巨壑兮簪組之榮良治託  
兮敏而好學博且約兮聿登科第虎鳳躍兮職兵若刑譽孔  
綽兮宅生樵李翔六鶴兮好古崇儒筋禮樂兮發姦摘伏滌  
庶虐兮急流勇退宦情薄兮得正而斃奚內忤兮幽堂永蟄

靖安縣志

卷之十二

藝文

八十八

不可作兮

